



清詩初集卷之五

武進蔣 鑰玉淵

選

錢塘翁介眉武原

吳江吳之紀慊菴

福清魏

憲惟度

江都郭士璟梅書

漢陽李必果仁熟

定


七言古

宿韜光望海日

毛先舒

稚黃錢塘

龍潭鷲嶺天下奇韜光更上升雲涯蒼穹髣髴欲摩頂
石氣濛濛拂衣領山僧邀我山中宿乘興扶筇滿巖谷
便應晞髮臥峯頭俯聽簷鈴和風竹夜淡月沒靜群籟
隔樹明河似縈帶須臾微紅乍起滅瞳矐正出扶桑外



天浮海涌見俄頃不覺此身駐西嶺誰持青鏡寫燕支
閃爍團圞無定影滄波一半吹紫濤良久不見東方高
凌風欲去更惆悵天水茫茫兩搖漾紺殿紅樓黯欲開
下方始聽鷄三唱

登靈巖山尋吳王館娃宮故址

汪懋麟蛟門江都

吳王仗劍昔圖霸義氣咤叱凌群雄萬夫築臺意未厭
山頭巡幸開離宮玉輦經過谷草綠翠旗搖曳山花紅
美人此時益嬌態獨垂長袖依前峯響屨廊中踏明月
館娃宮裏延春風俯矚太湖似明鏡煙波直射桃李容
其陽舊有琴臺石崢嶸岌業堪磨礱其陰更有西施洞
羅襪行處蒼苔濃豈意吳宮倏頽朽碧窻朱戶皆塵封

千年畱作梵王宮當時歌管今寒鐘湖雲吹雨佛面冷
蒼鼠竄瓦瑤臺空春女如花盡黃土殘僧牧豎來相逢
怪禽一聲叫林末客淚迸落春山中莫怨吳王國早破
古來聖賢俱長松不覺憂來下山去日斜煙霧空濛濛

還硯歌

周亮工

樸園祥符

高士硯如美人鏡寒花易使新粧靚宛轉簪花花亦憐
蛾眉如殺秋波淨髯公有硯真奇哉帝鴻玉紐不須猜
汾水囊中流不盡着面依肢盡綠苔類月涵星五色亂
欲紫不紫紅玉斷血光肅肅座客欽誰能竟作澄泥看
兩耳蜿蜒雙蟠龍正面寶餅綠芙蓉仙女飛來如拂拭
閒綠淨盡生春紅常笑澄泥類甌瓦締綌瀘盡聲終啞

此泥攜來當石彈冷玉清金聲上下波濤雷電滑與光
摩抄久之作古香他硯濡墨附此肌磨之恐與肉相妨
髯公割愛遠贈我惟我不言心曰可座客嗤予石三災
羞見青蓮生朶朶却思寶鏡去美人玉臺易使玉顏
即使團團生別照如花失月不精神何似還君君自寶
情之所在莫草草攫人遂欲移人情我訝世人輕所好
羨君寶硯與鴻文揮手相贈見君心曾經我眼即我有
我但欲與此君結為鄰

報國寺海棠歌

王廣心 農山華亭

入寺虬松盤登樓海棠發樓邊一株兩株花歲歲臙脂
染三月曾聞此花生蜀川珊瑚樹煖啼春鶉上拂銅梁

截漢之飛閣下照錦江鳴玉之流泉又聞沉香亭北催
妃子釵澤橫斜人乍起此際偏憐玉砌花濛濛並睡春
雲裏今何不得朱顏絳帳隨明璫又何不得桃笙筇竹
畱故鄉碧瓦無情石磬缺却來老寺陪空王空王寶座
琉璃照花落花開但微笑落處何如北闕雲開時那比
西山燒游龍車騎散朝參競詫新粧雨後酣獨有登樓
憔悴客攀花無語望江南

捫蝨行

汪琬 鈍菴長洲

君不見北海王郎年少時窮途賣舂無人知華陰山中
好山色惟許野叟同襟期忽聞關外舟師度入暮參軍
書露布營門劍戟森如霜獨有王郎懷刺赴晉家貴壻

非純臣赤鬚紫眼亦不群坐中相見便傾倒誰知顧盼
旁無人褐衣破盡殊坦率不妨談笑頻捫蝨抵君之掌
抱君膝中原陸沉三歎息區區卿相本易致肯與袁伏
偕出入灞陵橋頭波浪淡三秦父老爭掩泣君不見老
賊睥睨窺江東朝賢執版趨下風過江名士俱碌碌何
異群遊犢鼻中

放歌

許孫荃

生洲合肥

丈夫用世會須為卿相不則溪山大澤混跡于樵漁昂
藏七尺貴適意安能鬱鬱久居此終日逡巡執簿使我
低頭喪氣一似為人奴不如意常八九鐵如意碎唾壺
十年仕宦只如此功名豈即為良圖何不飲酒讀騷還
閉戶風塵逐逐胡為乎噫風塵逐逐胡為乎

為張幼量題蕉雨廊

梅

磊 杓司 宣城

高人胷中丘壑奇位置自與尋常別葑圃為園二十畝
疏渠疊石含幽色古木多年勝輞川名花異本移西域
長廊更種蕉百株斐几湘簾安曲折琴尊盛夏共徜徉
注目互對鬚眉碧有時疎雨隔竹來清響直與楸枰敵
又或月光下淡樹平地荇藻參差出君不見懷素草書
天下傳種蕉學書名綠天怪底張君擅臨池酒酣濡墨
不數君家芝與顛

送彭碧湖歸里

趙

賓

錦帆 陽武

盧溝橋上日欲暮盧溝橋下雪迷路千里敝裘無酒錢

北風吹折西山樹扁舟歸去且垂綸
泉水蘇門好卜鄰
平津閣前草三尺蹇驢休踏長安塵

廣陵女兒行

施閨章 愚山宣城

廣陵女兒多如雲香車翠幕來紛紛
蛾眉不惜青螺黛
蘭麝長薰白練裙生來不識弄機杼
繡戶朱簾學歌舞
庭前結駟皆貴人門外連檣復大賈
徐行玉珮何珊珊
十三十四就人看得金那問狂夫老
嫁遠寧辭行路難
狂夫作意看不足頻換新裝重結束
旁觀爭道是朱顏
阿嬌自許歸金屋弱質盈盈一葉輕
含羞宛轉不勝情
素手當前試斑管回身拂袖彈銀箏
片時乍喜春風面
玉腕親教約雙釧明珠今日買傾城
羅帳來朝共歡燕

歡燕無須吟白頭繁華滿眼不知愁
可憐桃李三春色
溝水東西南北流

煙火行

濟南亂後年初豐上元鼓吹如江東
歌兒遊女不知數
千家萬家春鏗紅爆竹聲中煙火出
忽如燄發阿房宮
撲地流光走玉兔垂天列炬成燭龍
橫看爛熳三十樹
風起高城滿煙霧明星落月飛縱橫
急電驚雷莽回互
層層怪幻魚龍戲蜃樓海市須臾至
蓮花火裏劇分明
中有天下太平字是時憲府高崔嵬
建牙列戟傾金杯
烹羔炮鼈惜良夜黃金灰燼等塵埃
酒酣漏永回鞭去
人壓看場呼不開我聞此地舊王府
夜夜鼇山照歌舞

綺羅臺榭竟丘墟園林寂寞今無主樂復樂兮延千秋
醉歌莫問王與侯安得四方罷烽火華燈秉燭長遨遊

西洋獅子行

譚篆灌村景陵

白帝商飈卷秋海淡日番人識真宰古里循封萬里來
通微坊中舊寮采至尊至能頌永年昌言稽首鶴爐煙
車書六合大體式臣妾遙控海西天中原林莽驅翼虎
五載陰風掣响嘖恪職修貢生俊猊轟雷噴火團腰舞
茸茸金毳應中央聲叶鐘宮駭大荒奉禮纔秩葡萄宴
將軍早報蹴瀟湘驅窺虎斃氣已奪宛馬新吹湖南沫
雲門九奏晾鷹翻陪臣歡呶殷膠葛聖朝本不貴異物
捷書并會良可述上林支給水衡錢鐵檻金鐙慎調拂

治曆由來藉遠人鳳鳴若木天宇春獅乎獅乎非徒爾
元朔大地走白麟

贈何書記

孫治字台錢塘

何生結交湖海豪腰中嶽嶽懸寶刀輒思伏橋報國士
豈願須賈哀綈袍予見何生且十年十年不見仍如前
被褐不完黃金盡壯氣直與星光連飲以八斗醉二參
激楚歌呼響雲天子亦吳越志節士與子屬和情泫然
嗟乎何生一書記于今高義復誰比思昔長者器孔車
豈有賣交重鄴寄何生所善湯半李湯子何生稱知己
一朝不幸長別離狂奴藉財群吠起何生覩之髮衝冠
斫頭陷胷不畏死我悲朋友之道不復存下邳翟公大

署門世上悠悠黃口兒我輩意氣堪誰論何生且復痛
飲酒當時輕薄今何有蕭蒿成林蘭葢葉避世陸沉是
吾友漫思虎頭出西河且至山陰籠群鴉我亦年來善
頽放長嘯酷似孫公和與爾扶杖出門去徜徉五嶽巖
之阿

風鸞詞

巖我斯

存菴歸安

城南芳草平如掌春風駘蕩晴雲朗何物瑩瑩綺陌頭
隨風宕漾青天上道上兒童意氣驕買得并州金剪刀
剪就凌雲雙六翅身輕那值一鴻毛笑謂今朝風力便
綫索在手如飛電宛轉經過翡翠樓悠揚故落鞦韆院
別院高樓春思孤長繩不肯繫陽烏黃鸝紫燕紛相逐
飛絮遊絲倦欲扶今年春事愁多雨昨夜狂風天末起
看爾高飛得意時站站終憂墮江水

綠珠井歌

林堯英

滄亭蒲田

傾城之姿絕代無羸得十斛大秦珠石家園亭委塵莽
此井泓淨龍洲俱桃花李花隨風舉玉顏肯與爭敷愉
萋萋上覆碧梧葉不宿鳳皇但棲烏蠻女成群露素足
行子顧之立脚蹰手提晶餅汲雲影青絲作綆轉轆轤
佳人已久化蜨去誰識當年照影處

歸不得行

杜

濬

茶村黃岡

杜陵老翁歸不得黃河之水聞歎息赫蹏乞米長厚顏
艱難轉不憂無食獨傷百口栖荒寺涼燠循環豈終極

初來北郭喚催耕臨去西堂鳴促織中間毒熱不可當
五月披裘心自惻典盡寒衣縫葛裳漫向人前炫要襖
青檀鐵研今何在買薪賣到書與墨老僧日日問我行
使我低頭惟默塞積逋凌雜難具陳豈第少渠僑賃值
况復無端忤俗兒窮途苦澁添荆棘不知忍耻復誰待
平生故人萬夫特嘗將松栢比君心嘗將山岳方君德
疥癩爲災祇妒余咫尺不得見顏色昨日緘書汗流頰
今日題詩淚霑臆老翁他事休再論歸飛願借扶搖力

赤壁歌

徐惺 子園江寧

黃州江山天下奇巉巖矗立煙離披下瞰百丈臨江陂
青青芳草生漣漪遠峯隔岸閒相窺日暮陰晴渾莫期

布帆細雨輕如絲習習不斷清風吹倏忽晴空月上眉
大江照徹碧玻璃世上凡流安得知曠哉蘇公千載思
舉盃邀月高吟詩泛舟來往無停時吁嗟高山流水應
如斯東坡先生豈吾欺試問千載之後更有誰萬古風
流真在茲

白頭宮女行

陳之遴 素菴海寧

白頭宮女自何至緇衣襤褸不曳地合掌長持淨土經
傷心尚憶前朝事前朝當日選嬌娃涕隨阿監入西華
黛冷修蛾難奉輦瑟操別鵠苦思家荏苒韶華度
自憐長在雲霄住蘭殿千重不記名桂宮九品寧知數
桂宮蘭殿倚天開玉柱琅玕徹夜催粧鏡未收紅粉艷

羽書忽報赤眉來赤眉攘攘天初曙十萬貔貅不知處
長安市上虎群遊玄武岡頭龍獨去珠沉翠歿滿瑤階
何幸昭儀玉蚤埋鴛鴦合殿旌旗亂蒞若珍臺劍戟排
劍戟叢中身偶脫香奩寶釧人爭奪梓里凋殘何處歸
花宮寂寞無聊活蕭蕭白髮竟誰依魂夢時時到禁闈
請看錦綺袈裟片猶是椒房舊賜衣

碌碌歌

趙

潛雙白
漳浦

碌碌之人歌碌碌自笑行藏雲與鶯生成大半類漁樵
習氣全狀在巖谷愛樹只愛松與竹有時把書樹下讀
愛花猶愛蘭與菊有時欹枕花間宿今日旅程四五千
去歲生辰三十六朝為饑驅暮投林西崦風吹破茆屋

主居其七客居三秋陽如火當前暴妻孥嗟噫我強安
遙看野色來黃犢丈夫失意莫逡巡醉來即歌歌即哭
何如與世同浮沉看人雲雨常翻覆得暇任揮伯牙琴
招尤莫和漸離筑但愁有山無錢買但恨有巾無酒漉
勝日賓朋不進門清川鱗羽不在目竹松蘭菊無地培
且種胷中舊煙麓峯霞卯月見平生冬謝春風隨意馥

端午行

鄒祇謨

程村
武進

綠陰槐午薰風起少年掉臂入都市繁絃急管效姑蘇
雕旌畫舫驕揚子白雲溪水東西流三聲鼉鼓青龍舟
平頭奴子挾大扇髻雙鬟上小樓蛟子龍孫鳴漿怒
長年倏忽朱旗度踏波不數弄潮兒輕榜紛紛凌雨霧

珠簾夾岸多神仙小玉嬌慵最少年低鬟幽恨垂蟬翅
閒撥雙雙鴈柱絃更有榴花臨盡閣細泛酴醾金鑿落
阿姊輕彎小角弓兩妹戲抽長命索行人捋髭多徘徊
紫驪蹀躞從西來金縷鸞紗嬌欲語藕絲葢粉恨難開
畫角一聲水戰緩繡箔齊停波勢暖高笳大鐺止喧逐
短衫窄袖方塘滿就中惟有孝廉船建瓴倒酒如飛泉
夫人傳索彈箏伎座客爭分鬪葉錢幽幽兩槳離清晝
韭盤狼籍偏提覆前路誰家朱雀航輕攏漫撚饒紅袖
紅袖不來應柰何士龍大笑落清河虎髯拔劍起斫席
玉翼朱欄瓦礫多廬兒碎擲綠帆色美人遺落金鈿飾
錦衣公子徒倉皇白頭尚書空歎息又聞重門小苑紅
扇圍門外狂生半醉歸急粧方麴橫輕幘笑詈朱樓當
紫陌老拳半飽霍家奴小奚追怨黃公壚碎却接籬帶
傾側路旁拊手俱胡盧吁嗟乎龍舸鳳幟日當五博得
十千官店賭朱牌祖吏袒胷呼白打市兒連袖舞何不
綵毫自作午時圖何不紅絲自刺辟兵符吳鹽如雪相
對飲青青小甕栽菖蒲銀箭銅壺天曙早雙雙乳燕粘
青草金犢車歸綵鳥空鱗鱗不動波光老遊人再至欲
不前頽垣斷岸徒依狀綺窓掩處眠鷓鴣三兩垂楊似
昔年

早發華陽鎮

魏禧水叔寧都

七月五日阻北風江頭白浪高於篷中秋夜泊華陽鎮

琵琶琥珀聲琤琤月高鷄啼天不曙官船吹金起擊鼓
不聞江上人語聲惟聞滿江動檣櫓北風漸漸江水平
高帆一出前汀估人利涉爭及時何能熟寢待天明
披衣出船我看月波黑天低光明滅夢中每愛放江船
月落空江鳴鷓鴣

西溪行

訪徐公偉作

姜希轍

定菴山陰

晴煙煖日游山陂春蜂食蕊喧疎籬肩輿逶迤到古蕩
清溪綠竹相參差竹色沉沉漸淡入人家茅屋曉露濕
柴門細路野鷄蹲破廟山花社鴉立久聞此地梅樹多
到來一片白雪窩幽香侵衣不肯歇清光照眼次第過
小舟蕩去蘭橈響林外青山若俯仰良友相期最賞心

高峯觀面層樓上

初置一牀

蔣

超

帖慎金壇

藤花棕線梨鐵堅檀心象齒沉水滄七十二鳳流蘇編
豪家公子始安眠杜陵先生歛瘦肩楮衾蘆衲如毳毳
幼安東海木榻穿坐臥斗室心陶然我來蓬山越四年
稔稽土銜地爐前吳儂逆鼻鬚通煙黥窓塵紙棲陶埏
若逢五月黃梅天蟣宮蟣垤尤迤邐經營一牀支俸錢
北人得馬南人船柔鄉醉國添纏綿蝸廬蜨圃多迴旋
當風入戶布帷寒迎涼避暑殊翩躚烏皮小几隱囊圓
中有太華斡神仙我聞元龍大牀百尺巔豫章高士榻
空懸洞庭鐘鼓爰居遷羲皇去後姬孔賢書不草揚子

汴言初集
立腹不曬邊孝先枕流漱石俱稱便剝膚剝足劇可憐
何用高燒銀燭聽鷓絃

觀潮

項景襄

片山
仁和

龕山頰山雙翠聳長風怒起洪濤湧忽移滄海入錢江
天吳鼓舞馮夷勇乍看足練忽分開萬疊靈鼉匝地來
三浙平沙畱不住驚湍直上客星臺舟子操舟無驚恐
前潮伍胥後文種翩狀一葉輕復軒如山觀者翻神悚
須臾潮漲復潮回霧散煙空收迅雷海若安瀾明月起
同歌清宴樂啣杯

朱碧山銀鑿落歌

李良年

武會
嘉興

退翁齋中遣淡酌當筵示我銀鑿落摩挲坐上一再看

知是吾鄉碧山作至元月日鐫彎環古文半蝕青苔斑
槎枒颯颯勢欲動宛若放舸滄溟間橫眠有客凌風渡
點綴衣裙逼生趣玉缸真擬瀉明河爲送張騫月支去
雕鏤無跡把玲瓏不解杯腹何由空鷓鷗琥珀皆不數
夜光金屈難爲工主人更勸勿揮手舊事流傳猶在口
元家學士數臨川秘閣相將此爲壽引杯謝客客賦詩
文采翩然動僚友亂離以來嗟失一往時作雙今不偶
歎息人間四百春斜陽細雨漉殘巾梨花絕勝蒲萄釀
傲爾乘槎海上人

青麥歎

林佳璣

衡者
莆田

烏啼啞啞日未曙擎弓彈烏鳥飛遽僣男弱女抱衾裾

清言初集
愁眉屏息易麥去衣不可餐何論錢抱麥好與健兒語
叩首路傍不敢啼平時門戶何敢著滿目蒼黃色酸楚
此生應讓太倉鼠

東洞庭歌

王鐸覺斯孟津

忽然吳岫來兼之水光杳蔽虧藏日月春容變綠曉莫
釐之峯與峯舞高者逼天開牖戶楊梅初黃綴衆星苦
竹淡青飛善雨轉望縹緲日將夕停舟入寺坐陀石野
人偏喜捕鱸魴老獺不慣駭霹靂天風颯颯磬音鳴海
氣山烟雨碎冑巖壑都歸有無際人天真在畫圖中斯
遊陰晦不盡美真宰相妒生譎詭明日躋險小萬山問
天巒洞孰成毀

盧溝月

楊大鯤秋屏武進

燕山西南有盧溝盧溝之上石橋浮行人過此傷明月
月有盈虧人不絕長溝流月聽無聲千載萬載傷人情
總使行人不見月南陌曠曠日還出貴賤低昂各有求
拔劍劖水水還流滔滔本是桑乾水當時草草輿梁耳
憶自明昌初建時長虹蜿蜒至今茲京師八景此居一
四望紅雲天際出不過茲橋已八年重來倚柱俯長川
車塵馬跡還如夢曉月纖纖復迎送忽憶東臯月色新
笑殺尋常行路人

十二辰歌

阮旻錫疇生同安

空房饑鼠啼壞壁牛衣臥病泣中夕通儒虎觀自談經

老歿兔園苦挾策空將絕技學屠龍盡蛇添足豈為工
馬革裹尸諒烈士何似羊裘釣澤中朝三誰賦狙公栗
客况真慚戀鷄肋隔歲愁無黃耳書道旁野豕向人立

思歸行

李念慈

劬菴涇陽

生不逢懷葛與羲皇誰能飽食無憂傷儒術誤人身狼
藉一行未就髮半蒼挂冠乞食吾何慍脫身不得返柴
桑長安貴游多年少自慚罄折形倉皇如薑心性老還
辣浸藥泉流苦正長文章未可裨緩急安能趨走空跟
踏君不見雲中有鴻鴈山中有麋鹿彼豈能夙儲芻蕘
與稻粱一飽不知來日事未聞紛紛餓歿道路傍豺虎
攫人腹常果家狸善媚食乃駭豪強諂佞皆飽煖落落

誠知吾計左櫛貴門前多長裾魚肉滿堂食客坐饑來
驅我思變策還顧骯髒復不可故里有廬谷口東門外
李白桃復紅日食脫粟擁圖籍暮吸濁酒吟春風鼓刀
亦可得甘脆力田豈得無年豐人生衣食固有分未必
青山負老翁

古淹城行

在武進縣南十五里

蔣

墳

寅升武進

南村之南七八里長松離離水瀾瀾古阜回環勢不止
行人過之坐復起我來坦步通壁門舉首垂垂雜花蕊
花間屋椽緣朽木再經暑濕全傾圮古佛剝落無完身
老僧咄喏指兩耳我行登頓復幾重倏驚日落沙場紫
吳王頓兵昔在此掘濠不出越質子漁人打魚入水底

常得劍器作田耜血縷已淨光芒歿有時夜半雷雨作
龍吟欲立空潭水紅旗的爍下空原白骨嗟峨壓軍壘
吸歛變怪安有常沈寥風切天雨霜船人偃仰不欲臥
洞庭仙樂來何方疑是吳宮罷游宴短簫橫篴紛芴皇
游魚載泳飛鳥下微風澹蕩水荇香人間富貴那長在
齊謳楚舞空兩傍况遭世態多反覆百感煎心撫心曲
十年不得解征鞍今日從君草堂宿還因逸事起抽琴
溪水泠泠哀怨淡

野田行

朱鶴齡長孺吳江

衰草糴糝掃行跡野燒連雲古田黑田中丘隴日夕多
蒿露朝朝泣新碧富貴難爭白骨春塚邊松栢辨何人

今日耕犁斷斷瓦玉臺當年梳墮馬

冬日江城罷市感懷

熊文舉雪堂新建

江皋風疾捲龍沙官府紛紜似散衙停舟泊舫人馬亂
坐看雪浪舞濤花熒熒小民既罷市攘攘客子亦移家
天寒日暮柴門閉但見老樹唳棲鴉道人布被冷如鐵
起剔燈焰吐奇葩呼童熟睡鼾不醒誰拂湯鼎為烹茶
更淡漏永城迢遞鷄聲喔喔鼓微搗病夫愾息民憔悴
雖有痛癢無人爬何時粵嶺狂氛靖暫與江黎甦嘆嗟
眼前滕閣耀戈甲孤負晴空點落霞

射虎行

陳廷敬說巖澤州

北平太守飛將軍城南射獵天風昏射虎中石沒羽箭

至今石戴霜花痕蕭關昔日良家子結髮從軍動邊鄙
材氣無雙屬國知霸陵亭尉醉呵止一朝飛蓋來北平
三邊夜無刁斗聲將軍善射出天生射敵欲盡兼射生
虎也騰傷上猿臂將軍意氣輕搏刺怒形威振萬物伏
精爽足可貫厚地我來訪古盧龍傍廣不逢時吾黯傷
吹簫屠狗有異表時來起作諸侯王

裁衣曲

毛達錦來新城

欲寄征衣須早裁莫使寒到衣不來衣不來時寒更苦
郎着敝衣人欺侮欺侮將奈何敝衣倩人補邊城有婦
豔明妃蛾眉螭首身願願慣結相思縷為人補征衣使
郎補衣往來熟恐到封侯亦忘歸

過長平

董文驥玉虬武進

日暮停車狼孟城驛樓地是古長平趙卒同坑壯者盡
髑髏模糊山與京居人往往掊金鏃土花碧血綠于玉
秦趙加兵記舊聞趙王之愚何足云千金間信馬服子
堅壁遂易廉將軍括之父母皆知子相如亦言膠柱耳
用舍淆于王不明讀書誤國嗟如此君不見殺降往往
為鬼雄戰場啾啾生陰風青燐白骨蔓草見前有銳頭
後重瞳杜郵伏劍東城刎天道何曾以壽終

兵船行

王昊惟夏太倉

陣雲壓城城日白羽檄分馳騎充斥颶風昨夜起鮫宮
鬪艦千群復何益憶昔軍興催造船吳民髓竭無金錢

刺史流汗縣吏哭老農含血遭笞鞭一朝連烽迷海道
帆檣如山倏然倒旗鼓虛張楊僕營艤艦已入田橫島
沙溪十里飛黃埃人家門戶晝不開提刀躍馬滿街市
海船方去官軍來君不見軍中健兒不羞走盡是幽并
好身手十村九村無人煙不掃鯨鯢掃鷄狗

晉中送友還金陵

嚴正矩 絜菴孝感

金陵遊子勒金羈臨岐不發有餘悲南渡滄江秋色晚
槿花柿葉何離披晉陽道上霜如雪把酒牽衣爲惜別
人生雖非麋鹿比聚散風煙長哽咽豫讓橋邊一遇君
藐姑山下又離群相思惟憶秦淮水送君歸臥敬亭雲

竺道人畫龍歌

道人自武當來僑寓金陵年百四十四矣

羅坤 弘載會稽

道人白髮雙瞳青布袍筇杖無逢迎手輪甲子忘歲月
珊珊骨節轉黃庭牀頭一卷古莊子道是此中有妙理
世人不識逍遙篇空把年華付流水半足鵝溪喜畫龍
黑雲蒼霧騰虛空鱗爪猙獰極光怪明珠一握守心胷
忽然窓外翻狂雨怒龍欲捲風雲去四座相驚並嘆嗟
道人視龍如姪女

吳山

嚴繩孫 孫友無錫

吳山翠削城中起半入平湖半江水百雉晴開樹色間
千門月落烏啼裏星霜遼絕望關河猶記完顏立馬歌
古往今來何處所亂雲斜日海門多

催粧曲

陸圻 鹿京仁和

鴛湖女兒顏如花十五學得箏琵琶朱唇玉面當牕度
妙舞清歌欹髻斜分明初入平陽館可憐吹送莫愁家
家住城西近南陌揮鞭時有青驄客風前楊柳却如腰
簷際梅花常墮額風前簷際祇誰憐公子風流正少年
才誇繡虎成雲錦身傍盤龍醉玳筵醉後含情似膠漆
情投嬌態情非一杯浮掌上玉雕鏤香裊屏間金屈膝
此時宛轉夜啼烏此日明珠買綠珠終當碧玉還偷嫁
誰說羅敷自有夫羅敷碧玉歡相見解取雙襦貼雙燕
始知名士悅傾城何必羞郎掩團扇枕上搔頭落粉痕
堤邊鶯管催芳甸君不見繁欽定情詩殷勤叩叩須及
時又不見張衡同聲歌衾幃菅蕩柰樂何樂罷啣哀淚

沾臆自古佳人難再得樂莫樂于新相知相知猶及好
顏色拜客須今徧座中莫教落花長歎息

題借書圖

胡會恩 孟綸
德清

江郎磊落英多士胷羅萬卷醇且肆夜郎筇竹天茫茫
攜將彩筆來燕市燕市悲歌意氣親論文總是素心人
生平雅負借書癖世間圖籍皆家珍松筠庄上王給事
沉香亭下李學士寶軸丹籤二酉藏供君晨夕探奇字
書來酒至兩悠悠菊綻風香正九秋但使白城長醉擁
那知四壁動羈愁嗟余躑躅東華路夢繞家山讀書處
重譯伊唔蚪斗文舊業茫如墮煙霧我聞天地大文守
靈威汲冢禹穴何足奇安得憑君借取千萬卷許我狂

呼浮白相追隨

雨中野老行

李昌祚來園漢陽

一夜北風吹暮雨不寐呼兒尋漏補曉起晴陰分兩角
蕩舟濛霧愁無數將進酒酒微醺彈碁漫唱沁園春歌
聲斷處腸幾迴柳絮飛青燕子來江上行人去如織一
日十里帆不開憂心草草誰為寫溪山曾坐風雨下垂
綸且向谿東西茅屋看山又瀟灑回首不見南村有蓬
門野老漁簑獨立者又不見終霾沉沉周四圍車馬客
多不得歸蓬門之老尚閒閒何必廣厦千萬間

天馬歌

袁佑杜少東明

天馬貴直千黃金鳳頸龍文汗溝淡剪驥鞴出無人顧
垂首至膝塵埃侵夕出咸陽門夜涉太行坂鹽車盤盤
泥沒輪四蹄躑躅羊腸遠嘶天風振林木電光霍霍閃
魚目飲流山下羨白犢嚼勒嚙澗草沙寒草不肥崑崙
上有禾空長五尋大五圍望金臺憶赤水風霜漸恐加
長齒何時解衣遇孫陽一夕為君馳千里

酒人歌

方象璜雪岷遂安

結交遊俠少年場酒徒由來稱高陽十千曾買新豐醉
鬱金時酌蘭陵旁長嘯目懾羽林騎徵歌作使邯鄲倡
左呼白墮右揖杜康一石亦醉千日何妨酒泉可封釀
國可王男兒傾杯且痛飲世事齷齪寧陸梁褰幔對騶
何足怪結巢花頂自稱良銅臺盛歌舞松栢徒蒼蒼金

谷多佳麗蔓草委朝霜日月云逝不飲胡望三萬六千
勿虛擲百年行樂惟醉鄉

題李供奉醉歸圖

徐啗鳳 竹逸宜興

才人自古多不羈放于詩酒標風期姿骨矯矯出塵俗
縱橫跌宕真匪夷興來痛飲長安市白眼高歌傲天子
玉河橋畔驟青驄飄然欲入雲霄裏君不見張生圖寫
李青蓮賜燭歸來帶御煙豪情逸態溢生氣千秋共識
酒中仙

二月花朝步朝天宮紀事

陳寶鑰 綠厓晉江

二月之中花初育乍雨洗花如新沐步入冶城樂沸來
羽流悅聖薰天祝此城為宮始何年學仙亦如礪劍然

火無百煉不成劍道無萬劫不成仙磨得仙骨同劍利
古來劍俠仙家戲不貴虛無道自來矯誣之君仙不至
神仙之至非一道邈邈飄灑長春老冷謙魂向瓶中呼
爛頭作事亦潦倒嘉隆以後無仙跡却咎氣運與地脉
譬如冶寒劍不成世無仙學何自獲只今劍化仙何歸
朝天宮宇依然巍笙鶴不知鳴夜月黃冠猶着舊裳衣

猛虎行

吳 松巖吳江

君不見鬪氏生兒類其父雲夢澤中待乳虎又不見三
笑亭前有虎溪遠公修靜俱巖棲爾曹殊有生人理今
獨縱橫非昔比疲人能幾皮骨存咆哮跳擲胡為爾爾
牙銛利爾爪堅爾欲逐逐腹果然豈知翠駮隨車後更

有黃巖守樹巔

綠水詞

許之溥 庶菴武進

綠沼迴波漾青草鷓鴣聲染蓮枝老苔影欲上簾影低
鳥語催人天未曉曉起輕寒柰薄羅風前縷帶不勝波
練裙香動竹葉小玉燕斜簪霧色多霧色花光錦裏過
年年歌笑復如何妾身不及桃花葉猶逐輕風度隔河

五人墓

謝良琦 獻菴全州

聞之五人賤士耳慷慨一時輕天子姦人當路吾道窮
緹騎不歎五人歎歎葬名山骨逾清松楸蕭颯多悲聲
黃雲白日照丘壠至今俠氣都如生忠義沉寃衆所怒
猶有芳名足千古君不見當年獻媚毛中丞白骨寒山

化爲土

鞦韆詞

徐 緘 伯調山陰

青煙裊裊金博山花枝低垂春晝閒廣庭潭潭長百武
芳樹陰微日亭午小姑粧罷倚闌干惱殺屏西白鸚鵡
金釵欲墮嬌不勝憑誰扶上鞦韆繩趙后便娟掌上輕
羿妻竊藥月中奔春風倒捲紅綃裙只愁飛去化彩雲
黃鸝紫燕爭偷眼游絲落絮吹來煖鴛鴦機上迴文遲
翡翠樓中夢魂散鬪捷爭妍歡未央黃姑織女愁河梁
莫言今日鞦韆樂明朝挾瑟上高堂

秦箏歌

送顧幼南之邠州

彭孫適 駿孫海鹽

君不見秦箏聲最苦孤鴈流哀生極浦擘絃促柱一再

彈隴首征夫淚如雨關河迢遞三川道古時蒼茫秦樹
老萬里行人聽暮笳五原賓從空秋草故人擁傳向秦
城杜甫山堂月正明曉參漸落箏聲歇不見秦城見明
月

西園梅花歌

蔣 伊 莘田 常熟

吾家西園枕山麓白雲淡處梅花屋松根石磴盤空高
幕捲南樓飛翠濤春來踏破蒼山路醉臥胡牀邀笛步
陰崖一夜奔風雷花氣濛濛遠香霧憑闌高望色如瑳
南枝數朶顏微酡兩袖寒風吹雪乳半窻明月漾銀河
此時風月花朗朗枕石高歌玉山上山中人靜清露寒
龍吟萬壑松聲響骨色蒼然老出塵屈鐵交錯枝嶙峋

誰家雲髻飄輕粉笛怨樓頭思殺人由來清景真奇絕
寒流噴薄水壺徹如觀滄海夜來潮會泛剡溪晴後雪
星橫斗轉天地空却疑身在峨眉中踟躕素質驚飛鶴
天矯霜枝起蟄龍一片晴光嵐氣沒狼藉冰花照肌骨
雲母屏懸十斛珠水晶簾捲千山月看花獨立影徘徊
笑揖高陽舊侶來綠酒盈尊客常滿相逢握手朱顏開
夜半西風起前浦寒蛟怒戰飛香雨落花滿徑聲珊珊
可憐數日成今古醉歌一曲風蕭然長嘯一聲衝暮烟
丈夫意氣橫九域會須奮足登青天起舞龍泉劍花碧
馬周昔作新豐客少年志欲凌雲霄世路風波還自惜
君不見燕山霜月白皚皚故人直走黃金臺西曹禁網

南冠泣易水長歌去不回
又不見山公啓事成何用
淒東市悲風動嚴助聲名
安在哉華亭鶴唳迷歸夢
眼看浮榮委逝波橋西沽
酒踏輕莎花前一樽吾足
矣潑墨為寫梅花歌歌闌
玉壺缺昨日青絲今白髮
但願梅花歲歲芳蘭生影
裏清輝發酒酣狂叫驚眠
鷗萬古閒愁一笑休幾樹
花梢寒月上醉鄉應得到
羅浮

題東坡畫像

陳弘緒石莊新建

疎髯離離目光爛叠縫斜
中立危岸蠻風颯雨驅潮
來先生醉眼摩霄漢平生
所欠惟一歎胷中浩氣吞
海水桃榔林邊墨萬行下
視蔡章真犬豕五星散盡
奎無芒帝傍不復降鄒陽
當時中國無容處此日何
人不酒漿

老菴基

張惣南村江寧

夜嵐生曉雲起磊石雪飛
翻泠泠聽澗水我斲石筍
穿嶙峋空山十里悄無人
窈窕琅玕森綠玉宿公茅
屋冬如春三十六峯隔奇
嶺出門步步顧峯影

滕王閣歌

徐嘉炎勝力秀水

章江水濶迴波紋滕王高
閣連江雲春澗花紅草方
碧蜨飛五色縈羅裙我行
乘槎望東粵揚帆且浸南
昌月南昌城東芳草長盈
盈欲渡川難越簾櫳飄拂
夕陽間夢魂飛不到關山
却上高樓瞰南浦雕闌十
二怡丹顏日窮千里傷心
度帝子不來春欲暮珊瑚
之鈎玳瑁梁可是當年舊
游路舊游衰歇新游頻長
鬢薄髻啼粧春

伊伊畫角鳴刁斗詎知中有如花人歸濤納納欄前水
舊愁新恨無窮已不數琅琊大道王却笑邯鄲遊俠子
古來朱邸何代無曲池高榭俱平蕪芳塵散盡羅衣歇
啼鳥無聲但鷓鴣沉吟可是傷心客買醉能呼江月白
才子文章應有神一杯還酹臺邊石擊劍高歌行路難
江頭雲影生層湍長風破浪還堪許便欲凌霄振羽翰
冬日重過遼后梳粧臺

曹爾堪

顧菴嘉善

亂石礫硠黑于鐵高臺欲傾水聲咽宮中鳳輦昔曾過
剩粉殘脂聽傳說地歷金元多廢壘更閱明朝三百載
荷芰霜凋鸚鵡衣菰蒲雨暗鴛鴦彩轉眼繁華卽變遷
荒郊宿莽沒釵鈿珠歌翠舞香難問薛痕斑蝕縈寒煙
下馬憑弔酸風苦盤龍辮髮誰家女玉竦橋邊烏夜啼
嗟嗟如聞契丹語無情芳草葬燕支首戴髑髏走狐狸
祇餘臺畔垂楊柳猶似當年淡掃眉

貧交行

田茂遇

鬍淵華亭

古人不貧才不老今人貧乃傷懷抱古人結交重青雲
今人棄置同秋草今古人情何太殊我來仗劍邯鄲道
邯鄲城中遊俠多邂逅相逢意氣好腰間脫劍且按歌
尊中有酒復傾倒上堂拜母下揖嫂與子縫裳復剝棗
君不見古來英雄不用爲傭係叩角行歌石皜皜

倭漆引

林嗣環

鐵厓晉江

閩海腥鹹龍戶胎令嚴越販誰私開曩歲每候風帆到

相載遙從日本來，刀布金錢無不有。市兒恣喫東洋酒，
卽看倭漆亦殊倫。嵌蚶堆紗稱鬼手，塗髻暗用金銀地。
歲久終無雕鏤氣，一枝花鳥尤矜新。百鏤千鑲爪髮備，
昔云舜作漆器諫者多。亦傳夏禹篆彫戈，周禮冬官詞。
闕載莫防淫巧傷天和，又聞徐福行時具百藝。只今倭
子多其意，蔗段諸式各匠心。不但盤匣畱秦製，張楊兩
人復爭工三十六次鏤。剔紅摩娑劇于十八女耳邊，無
數海濤風。

賣解歌

陳玉璣

椒峯武進

長安小兒氣如虎，走馬街頭渾脫舞。一騎奔突東復西，
追風逐電何足數。須臾復有一騎出，青絲絡頭態嶮峻。
腕促蹄高汗流血，似與小兒心膽一。忽然兩馬並轡馳，
前後進退俱相率。小兒頭上置翠盤，齒嚙曲筋敲成節。
紅繡刺胷錦纏頭，疾於雲鳥雙飛翼。復有一騎坐兩人，
兩人位置各有神。有時背作袒臂舞，有時對歌燕市行。
最後小兒拍手笑，大呼此技豈云妙。拈鞦一躍五花驄，
兩足向天身手倒。左手執羯鼓，右手披色組。翻身落馬
持馬足，馬足騰空身置腹。覩者如雲都叫號，諸兒罕敵
汝尤高爲語。小兒慎愛惜，從來駿足原難得。君不見黃
金臺，昔日昭王安在哉。又不見冀北野，只今誰是空群
者。小兒小兒須努力，下馬與汝傾一石。

挾彈曲

朱爾邁

人遠海寧

玉靶金鞬紫綺襦少年挾彈出城隅朱弦不試流星石
素手飛來明月珠東有鴛鴦西鸚鵡紛紛匿影交相屬
轉眼纔收沙上鷗翻身又下雲中鵠雲中沙上驚如神
顏色不動彌逡巡他年廟堂之間有爾什伯輩定教高
閣圖麒麟

西洋石歌

毛蕃雅賓嘉善

燕都主人絕好奇手攜怪石光離離絳雲紅日華參差
高樓四阿雜綵施須臾變幻易容姿古樹蒼茫五色垂
天邊霞影何紛紛披乍青乍紫無常儀我聞補天鍊石女
媧時此石母乃當年遺山川奇氣應在茲覆以文錦什
襲之奇光弗令蛟龍窺不然神物難護持吁嗟乎從來

神物難護持

香水菴放歌

車萬育鶴田邵陽

春郊霧擁迷朝暮谿流曲曲看成路我來踏斷草橋煙
小艇參差橫古渡帆開遠浦棹清歌兩岸垂楊牽菱荷
新綠到江澄萬頃日光落水翻千波大香水海圓且慧
禪關隱隱雲封閉法藏叅來一字無莫與山僧分半偈
登樓日送晚天霞煙火鱗鱗幾萬家一望蒸湘雙練出
合江亭上夕陽斜夕陽樹裏山雷照不盡遊人來往眺
竹陰深處如有聲耳邊疑是蘇門嘯薰風南來殿閣香
聽徧前廊與後廊奉得眾芳盈兩袖歸途燈火雜螢光

喜雨

羅世珍魯峯漢陽

五月枯旱烈秋陽平疇望盡草欲黃
倏然北風送晚涼
游雲變作仙女裳
騎龍叱電山之陽
奔雷擊雨到石牀
須臾原隰起蒼茫
溟濛洞壑濕飛揚
水絲滿坐列羽觴
檐花清潤度餘香
薄田麴蘖足秋藏
何事崎嶇遜阮康

豆花行

法若真黃石膠州

江東七月豆結花
流民山底暫歸家
伐樹為欄鋸木壁
牛羊亭午臥青沙
婦子驚喜觀簫鼓
樓廠墻頭皆側目
射策諸子書滿船
瀑水橫波拔大木
柴浮淡曲月離畢
秋雨紅飛悲枯槁
將軍用兵莫倉卒

西湖打魚歌

呂祚德大坏金壇

湖頭漁人醉歌舞
昔日王孫今噲伍
湖中漁人皆錢氏裔
澄瀾密

艇圍翠鼠不似波
濤射強弩一隅困
守何區區三面皆
開澤流溥苻藻橫
斜葑草齊漏網紛
紛紛何足數倒腥
賣與販魚兒聞向
長街覓清醺仰天
鼓腹甘如飴明月
船空歸去時吁嗟
乎漁人王孫不可
為而可為

客夜

魏憲惟度福清

杜鵑夜叫東風急
埵澤城樓鼓聲入
孤館牀頭劍不鳴
起坐徬徨還獨立
結髮翺翔遍九州
長見彗星交原隰
赤膽難將知己酌
青蚨飛上金閨集
天工耳重聞不聞
濛濛露下鶉衣濕

西坡感

王曰高北山荏平

昔年跋涉奔此道
彌望蒼蒼只荒草
今日駐騎西坡旁

綠茵萋萋蘆葉長愛此躊躇不忍去無人共語醉斜陽

畫魚

羅人琮紫蘿桃源

壁上蒼冥掛秋水中赤鯉縱橫起鬣舒尾轉志狎騰雲氣垂垂波光紫隱見濃澹片片鱗靜觀反覆愈有神江湖何處無網罟潛躍憑虛久未驚凡魚自應充廚庖此圖丰度亦龍曹空堂每當雷雨夜側恐破壁干清霄

龍門歌

毛會建客山武進

二儀既判洪水洩九河欲分龍門裂崒岬兩峯高插雲奔流一瀉天險失我登龍門思禹功我觀龍門思禹德崇伯九載績弗成惟少源頭此一撥有如縛虎殺其怒又如養老祝其噎大禹神智自天開豈從金簡玉字得

龍門關後水土平民獲安居兼粒食百王從此盛威儀莫忘當年胼胝力

題石操畫梅

楊雍建以齋海鹽

愛君筆墨何紛郁老翰清蒼寫幽獨自是色聲香味盡使余紙上尋溪谷雪點凝含二月春中庭宵渺凌松筠根盤石窟不可見毫端爛熳皆天真昔夢羅浮山頂枝枝頭移向此間垂連旬風雨無摧折壁上煙霞落去遲遂令滿坐生清冷白日珊珊僊子影焚鑪靜對兩不厭呼童汲水煮龍井古來高士賞未足問圃登山徒效數何如尺素冰霜姿臥遊累日能藥俗

聽韋郎吹笛行

曹侍郎秋嶽席上卽送其出塞

朱彞尊錫鬯嘉興

韋郎舊隸羽林籍曾向營門教吹笛不聽吳中白雪音
定呼鄴下黃鬚客平原相見轉相親置酒誇君坐上賓
北海尊罍朝未罄東山絲竹夜還陳閒來坐我花間奏
玉洞飛泉響巖溜古調多傳關馬詞新聲似出康王授
問我東行到海壖日斜江上慘離筵還將北鴈南飛曲
催送錢塘楚客船船人搗鼓津頭泊紅葉千山富春郭
忽作邊秋出塞聲江楓岸柳紛紛落哀絃促管不堪聽
賓御聞之亦涕零挂席還移嚴子瀨看山直上謝公亭
聞君欲問雲中戍雪消飲馬長城去廣武臺邊折柳晴
胡盧河上題詩處司農自是出群才此日征西幕府開
試向尊前歌一曲梅花飛徧李陵臺

題畫

王澤弘

吳廬黃岡

去年身臥西湖水今年看畫西湖紙宛然坐我一葉舟
相送孤山小亭裏遠山遠水如無心一筆兩筆藏真理
不用墨處更奇絕雲煙萬丈經寸耳平坡淡樹何紆迴
筆所凝注遂數里方竹杖苾草履愁顏只為看山喜踏
盡五湖歸不歸七十二峯從此始

泊閩門

王鴻緒

儼齋婁縣

津亭夜泊檣燈齊江鴻欲落寒鴉棲城水搖城城影動
銀河抱樹明星低齷齪風塵牛馬走離心謾折閩門柳
五更雙槳又孤征毘陵道上空回首

懷馭鹿兄

時在遼東鎮國公邸

蔣景祁

京少宜典

伯氏磊落天下士蹠躐驪騮走燕市明珠夜投按劍揮
曲高和寡知者希胷中萬卷無一用俠遊衣馬何輕肥
黃金費盡黑貂敝旦夕賢王降書幣不須進奏鬱輪袍
光生蓬葦徵書繼回首當年學老農今朝驅馬出關東
丈夫立功當萬里四海方今一家耳愧余困守南山陲
輟耕太息懷吾子

吳山絕頂看舞雙刀

王 暉丹麓
仁和

振衣獨上吳山頂錢江浪闊連天迴極望空濛意自豪
林景森森日欲暝却顧乃知俠少年身與兩刀相盤旋
猛如迅雷挾飛電驟如疾風驅輕煙一舞再舞何神妙
木葉驚翻野鳥叫左右迴環不見人霜鋒但有流光耀
此時英雄氣莫當觀者如堵俱徬徨安得喚取守四方
爲君宣力靖邊疆

觀濤

夏完淳存古
華亭

大海出沒波滔滔魚龍銜日百丈高倏忽蒼茫天地合
咫尺不辨神靈號江中小艇不敢渡浮雲漠漠隔江樹
海女霓旌乍有無雷鼓填填屏翳怒靈旄冥曼青濛濛
虛無四面浮芙蓉丹楓葉落碧波冷一上一下聲淙淙
須臾風起水勢作天門乍開秋不落江妃歌舞流佩音
金河錦湍光灼爍登高極望空翠迷浩然激灑長天低
涵虛萬頃皆一色水面隱隱鮫人啼其中深淺不可測
秋山遠映嵐光白龍鱗半掛倒青波茫茫鯉魚尾三尺

嗚呼此水乃是滄溟來
長江如練浮天垓
雪花片片流不盡
北風直到天津臺

牡丹花下歌

錢陸燦

湘靈常熟

前歲花時渡江去
去歲吳門三月暮
三度花開一度看
今年恰在金陵住
金陵舊是帝王都
歲歲花開如畫圖
此花又殿春風後
朱衣王謝相傳呼
一筵釀費中人產
一花千人萬人眼
金盤綵籃競貽贈
招邀名士分折柬
永和蘭亭金谷園
月落檀板催金尊
百尺烏絲長到地
清詞艷句爭飛翻
得所穠花易消歇
子規啼血棲宮闕
無復天彭百馱花
王孫五勝埋香骨
花殘人散可憐春
十處園林九戰塵
欲往城南訪耆舊
酒徒零落空芳辰

太史園中花百種
紅欵綠捧花頭重
花神有意洗粧遲
要擲詞頭固君寵
諸公同日看花來
鄧生酒甕還重開
廿年無此好事者
無詩不醉那能回
酒醉詩成花欲語
明歲花開待余汝
春雨春風作主人
鸞鳳泊同羈旅

夏日虎丘來仙樓讌集

陸光旭

鶴川平湖

山城十里清溪屋
塔影峯前連夏木
謝傅招攜入遠林
披雲更縱南樓目
樓中明月憶當年
津閣笙歌繞修竹
燕子簾空鎖夕陽
茶煙日澹生公麓
凭闌鳥聲出松路
脫帽好風真所獨
刺史風流蘇白才
建安詩格凌潘陸
臨觴朝爽挹鬚眉
射果仙才偏敏速
洞庭煙蘇臺鹿避
暑遺宮香草復不
見長安赤日火雲
齊分曹馬背聽晨

鷄吳歛楚髮終頭白誰識黃鸝樹樹啼

短歌呈楊自西開府

李棠星巖

孤根瘦榦烏臺栢東風嶺嶠南遷客火劈燒痕翠鬣焦
石摧枯樹蒼皮拆蔡州魏博忽縱橫城破家亾處固責
引刀絕粒剩餘生草間飲泣思歸國欲識孤臣萬里心
埋名山寺詩題壁細柳新蒲杜老愁魚箋鴈足蘇卿帛
隱居南嶽脫身來曾在行間佐經畫側聞節度鎮黔中
鏡吹油幢陰晝碧寒雪淒風逼暮冬當年裴相平淮策
羽書泥蠟散人心間道開關通地脉聊城傳箭魯連存
西夏行師唐介謫伏櫪空憐失路材此身敢爲酬恩惜
捲甲提戈定百蠻計日三春應獻馘寄言萍梗在江潭

漢水如心一片白

題錢舜舉楊妃上馬圖

俞南史鹿洲

霄川畫手稱奇妙事事寫神不寫貌花鳥人物悉如生
丹青未設思先到茲將絹素寫楊妃宮娥簇擁天人姿
不畫宮中行樂日偏畫臨行上馬時憶昔玄宗天寶末
不聽忠言重傾國祿山擾亂逼京師天子貴妃同避出
鳳輦鸞輿嫌尚遲金羈寶勒下瑤墀扶上香鞵凌玉鐙
至今照耀生光輝此時六軍亦並發萬騎千乘離城闕
前途齊噪不能行一旦紅顏馬前沒玉環已碎海棠萎
血染遊魂不得歸錦帳翠衾難共入金釵鈿合暗相隨
傳說當年歡宴日賀老琵琶李暮笛愛弟行觴華萼遊

諸姨連袂沉香集楊家勢燄傾京都身以國破誠須與
粧樓湯殿今何在空向人間見畫圖

弔淮陰侯

戚藩蕩菴

寓食漂母非無策受紿女后誠為愚生死不出婦人手
英雄顛倒如侏儒敢謂不足君死所築壇之日已捐軀
設令楚終位亞父叱咤不免膏鑽鈇不然轉戰京索間
迫阨或恐為楚俘一朝早坐連敖法不逢滕公生亦享
會當一死吞昊天菹醢所加即良圖淮陰少年見劍擊
國士報主今有無

題鍾馗嫁妹圖

王又旦幼華 仰陽

雲霧杳冥變蒼狗鬼物雜沓土囊口鍾家女弟艷且都

可憐嫁作誰家婦几杖牀幃夾道陳先期牽羊復擔酒
夜發度朔三百人曷鼻魑顏無不有十里喧呶不斷絕
儋荷殷勤少空手畢方搗鼓魃蠹歌相看未覺形容醜
山坳牛車聲聳聳車內女郎佩瓊玖縹軛輕轉何容裔
樂舞導前青衣後青衣的皪亦不羣或抱琵琶或箕帚
身乘龜鼈雉牛鹿海銜水犀疾奔走佳樹春山半蔽虧
修途曲折出花柳鍾家老子大有力驅策群妖世無偶
不煩葦索飼白額一時異類皆回首雙瞳炯炯頰骨方
騎驢最後踏林藪馘乎馘乎須早行天明日出君知否

望遠曲

盧綰澹崖 蘄州

明知人不歸日日樓頭望人尚在天涯只疑行陌上陌

上紅塵逐日飛何曾塵裏見人歸
經春歷夏無消息檢點秋風又寄衣

夜飲聽孟三度曲

史樹駿 庸菴 武進

君不見城頭籥築聲征人夜半霜
霑纓又不聞月下笙篴引彈之未覺
淚交隕宋女秦娥各有心繁絃急管情
何盡座客喧呼酒正酣梅花昨夢發
江南誰歌舊曲令腸斷昔有何戡今孟三

春日懷白華園

屈大均 翁山 東莞

櫻桃花發吳溪香客裏看春黯自傷
可憐海燕差池羽挾子翻飛歸畫梁
我家遠在番山峴此日清明天氣暖
翡翠城邊柳正長琵琶洲畔鶯初轉
舊栽梅樹玉堂邊

我母折梅大士前松風隔水吹朝梵
山月含霜照夜禪一別鄉園幾四載
浮雲舒卷彌滄海五色明珠不肯投
千金七首依然在紛紛天下逐雌雄
安期枉去說重瞳仙人本為蒼生出
大道難令濁世容楚客空知笑衰鳳
葉公不解好真龍裴回岐路將何適
采采芳蘭三歎息兩弟雖承菽水歡
鮮民未盡溫清節鴻鴈飛飛向塞天
誰憐落羽屢驚弦弋人應念銜書苦
萬里飄零非偶然

長干行

曹鑑平 掌公 嘉善

妾家舊住古長干蕩子風濤十八灘
一逐江湖去不返年年江上孤帆遠
正是離人腸斷時湓城月出潯陽晚
打棗行

吳穎 蘭雪 溧陽

雨中打棗實纂纂群兒持竿歎腕短風吹棗落官路滿
行人俯拾自救饑又痛饑兒將攜歸墻內兒飽知不知

堆紗屏風歌

劉醇驥千里廣濟

牀頭屏風尺五長自來姑蘇古吳閫吳人匠心好靡麗
五色堆紗作戰場塊北紛紜驀萬馬騎者魁梧勢更彊
鞞鷹縹犬展羽獵軒舞前後如箕張駟駿沛艾形態具
飄翻盡是繡襦褙什伍相集候飛走人須竿植馬鬣昂
爍爍百寶飾馳突鞭梢擊鐙倏遺光嗟此彩絲未成日
斷續續翻寒女恤流黃月墮羅襦單烏啼幾度停機出
織成文綺服官室片片剪雲如刈蒺花虬逐電須爾爲
蜿蜒生色更超逸猿臂材官亦假借縵胡韎韋省雕漆

自從固草選車徒射熊吏容天子俱盛事表章不可缺
千秋獻作長楊圖

蒲州鐵牛歌

黃與堅庭表太倉

蒲津道是虞都處當年稼穡堪畱記鼓鑄緣何到鐵牛
將無搜粟嗤都尉倚傍河山勢不移絲韁久作千年繫
不向春雲壟上耕只依衰草沙邊睡蹲踞齊當城北隅
行人過此皆停轡手共摩挲骨相殊一毛弗受冰霜忌
帖尾攢蹄年復年牧童枉白操鞭箠試問途中白髮翁
翁言總未知詳細記得先當大水年長堤倒塌重垣圯
鉅焰洪鑪勢不停屹然有四黃沙裏河伯愁看夔岡奔
支祈駭迸蛟龍徙從此人人信五行庚辛力大欺壬癸

一物平操生歿權長將昇元存天地我聞此語意慨然
宣房瓠子將何謂只今河患苦頻仍倒連淮水波濤沸
我聞絳州霍州皆有一鐵牛欲將并坐大河邊聊為抵
塞三門計

為冒辟疆悼董姬作

王 潢元偉江寧

博山篆冷爐煙歇苔階履滅香塵絕綺閣空傳錦字詩
總幃斜引疎窗月廣陵公子五陵豪當杯不飲何蕭騷
為問心傷者誰子娉婷曾說董嬌嬌家住秦淮側
文心蕙質兼殊色幾載纏綿漆與膠一朝形影成孤特
由來名士悅傾城惆悵佳人難再得佳人名士真希有
不比尋常奉箕帚碎琴誰更覓知音從此中閨失良友
昔為連理枝今作單棲鳥自是情鍾我輩淡莫怪安仁
頭白早君不見虎丘山下塚纍纍真娘墓上多芳草又
不見西陵松柏結同心風流千載歌蘇小

洗象行

丁 澎荊園仁和

南荒有巨獸曰象剋齒磕呀鼻盈丈細目如稀耳如益
貌詭龐然皮色蒼蒼兒童誘之作百戲擊鼓吹簫勢偃仰
飽食莖豆滿大斛給俸猶同百夫長花裙蠻奴獨許騎
馴狎不啻羊與犂身被錦緞金作羈屹如山嶽無差移
排班朝隨羽仗立儼然拜舞同軍旗自向滇南入中國
異物那得生西極忽產象犢姿態奇雪齒霜毛如拂拭
黃裕飛馳報大內御駕親調動顏色炎蒸急雨翻白波

詔賜洗象西城河高旗大鼓引導出路傍觀者肩相摩
躍蹕奔湍氣龕莽蛟龍掠奪爭相向獠官僉點二十八
掉尾旋頭各異狀似鑿昆明習水戰翻身搏擊吹飛浪
我聞瑤光之精化汝形黃門鼓吹充掖庭乘之以戰利
身毒負可致遠垂山經執燧况能却吳楚胡不摧鋒努
力掃除南服無羶腥象犢象犢吁嗟汝莫患日費官芻
供養豢時時挽出天廐中常得龍顏增顧盼

漳水吟

李世恪

共人江陵

策馬寒流眺空陌烟臥西陵風瑟瑟英雄笑咤走風雷
帳底美人泣明月月照魏宮曾幾時漳水千年流不歇
春陽曲

柴紹炳

虎臣仁和

霽雪園林遲日光葳蕤草長百花香十五女兒踏春陽
陽春自愛東風吹吹開繡帶寫新詞頽肩半鞞被青絲
絲牽片落花裴回黃鶯紫燕紛相猜日晚沉吟歸去來

鶴來歌

為寶應喬聖任年伯賦

張英

敦復桐城

青田有靈羽錫名為白鶴仙人王子喬跨之入寥廓碧
天無際海雲寬孤飛肯向人間落有客翛然池上樓蒼
顏白髮凌丹丘荷鋤自種青門圃絕口不道東陵侯聞
圖野服挂秋室縞衣丹頂穿雲出刷羽長鳴喚主人虎
頭回顧驚停筆從此香山居士圖傍添一鶴如相呼水
邊飲啄月中舞二十餘年時與俱先生服氣頗好道愛
爾閒眠藉芳草先生垂老好讀書一聲清唳秋晨早淡

味聞修知者稀仙禽瑤草思依依不然翠壁丹巖多舊
侶員嶠仙人呼爾歸胡爲花下隨人常不飛

征婦怨

丁

煒陽水
晉江

邊風瑟瑟秋蕭索鄰砧夜擣霜月白空閨夢斷戍煙淡
重理殘燈動刀尺憶從南國羽書飛嚴冬雨雪正霏霏
將軍受詔辭金殿戰士長征臥鐵衣孤城百仞重圍合
間道短兵恒相接終年苦戰陣雲黃丹楓空墮離人血
妾來猶未拜姑嫜熒熒獨守只空房男兒能備公家急
生女真堪棄路傍昨夜春風入桃李徒見花開難結子
知君不逐南歸鴻妾心自誓東流水

放歌行

楊大鶴芝川
武進

流光倏忽如電馳丈夫生世會幾時百年富貴差快意
何不食肉持梁刺齒肥不然風塵瀕洞起四野便當殺
賊作露布上馬或下馬二者倘俱與命仇亦須買田千
頃橘千頭一朝應詔輸家財不得二千石卽得關內侯
何爲折翮斂翼竄泥淖向人蹠躐慘顏貌亦曾發憤三
上書空使緇塵被衣裾緣邊奮志思赴募高牙大纛羞
前驅摳衣且復出門去旋視室中百感俱但聞病婦呻
吟罷機織癡兒叫跳索梨栗欲炊無杭麩無禾淫潦今
年動旬日惟有糟牀側耳聲嘈嘈且共梅花與爾豪

戴山歌

巫之戀密稱
蕪湖

山陰城中山含煙山陰城外山接天煙含綠樹風繚繞

天接青雲氣窈窕我來乘蹻一望之萬象崢嶸到眼奇
人家屋盡週山塢宅隙波清堪網罟亘橫三面奠坤維
一面遙連大海湄水湄碧入吳山外三面崔嵬青靄大
吳山越水昔空傳越山吳水兩回旋潤生金石同漱灑
翠絕塵沙矜點染細隨芳徑坐山頭畫閣危樓又古丘
閒花飛鳥偏綽約我對翻增嗟與愕人生富貴同塵埃
俯仰山川自往來王侯將相當年事斷碣殘碑憑古寺
旅懷且自縱杯寬青天明月共闌干

襄陽歌

蔣守誠正先宜興

南陽古穰州帝鄉在山陬城枕漢江面門對峴山頭漢
江新漲白波繞峴山舊碑青蘚了徵歌兒唱白銅鞮隆
中人上出師表元凱勒碑沉澗潭昭明文選藏瑤函江
皋解珮有神女少陵詩思驚人談習家池上風流客檀
溪岸邊真主蹟鹿門山中隱士廬復為孟六高人宅惟
有羊公一片石千年重建猶如昔

慎五典贈梁龍刀子歌

陳奮永馮謙海寧

天風翔黃鵠海雨遊神鯤男兒一生能著幾兩屐安能
刺刺促促白首老里門我來弔古越城裏朝漢臺傾尉
佗歎太息英雄血淚零路旁握手慎公子慎生贈我三
尺鐵云是羅浮百鍊之鋼無摧折靶上梁龍鑄姓名刃
邊寒氣森霜雪我將攜往南山頂採芝劖木調丹鼎鶴
鵲夜嘯魑魅號光芒四射空天炯不然挾之凌滄洲衝

開黑颶圖封侯絳袖襖紫袴褶橫刀立馬髯如虬少年豪氣兩俱盡唾壺擊缺懷空軫同時李郎贈我端州一片石色蒼理膩聲清引歸乎從婦索斗酒醉餘溪墨龍蛇走挑燈更試舞霜鉞爾共陳生三不朽

上春詞

單

恂

質生華亭

玉驄照眼穿花來揚鞭衝落花滿苔紅樓麗人香簾開菱銅初拭粧宮梅少年下馬太光艷簷頭啞啞嬌鶯催入門相看未忍坐春衫羅薄霜皚皚櫻桃欲然茶蘼瘦柳絲難縛韶光回驕嘶郎馬憶何處郎視東窻鸚鵡杯

廣陵楊花篇

趙

端

又昌錢塘

廣陵城外楊花飛飛來飛去撲人衣城中少婦顏色好一見楊花一回惱自從關塞起烽煙春色蕭條又幾年城中常見楊花落天外何曾音信傳邗溝一道通遼水草色青青萬餘里飄零最是三月中傷心愁殺東風起東風起兮楊柳新平山一望飛煙塵請看煬帝迷樓上曾有當年來夢人

輓史閣部

董道權

吳子鄞縣

揚州三月花滿枝家家壁上治春詩江南客來花未落憑弔傷心轉蕭索蕭梁遺籍杳難求若箇重開文選樓隋煬踪跡今如掃玉鈎斜魄怨芳草廣川故宅謝安祠璇題碧瓦相參差可見男兒尚功德千秋萬世還廟食憶我行年十三四聽說揚州乙酉事相公披甲歿孤城

同歿百萬無怨聲金陵諸臣公獨苦得葬衣冠一抔上
屈指春秋二十年墓傍榆柳叅青天紅橋修禊多詞客
誰拜先生墓前石我寓梅花嶺下寺經過細數碑陰字
豫章王翁此勒銘霜髯淚眼摹黃庭歲在丙申暮春月
我父借翁奠肴核只今俱作墓中人西臺往事徒酸辛
吁嗟乎相公披甲何時卸猶戰城南風雨夜

坐飛來峯下觀流泉

周而行 東雁金磨

飛來峯頭石齒齒清泉噴薄似花蓋松色叅天裊白雲
猿聲忽嘯古洞底孤亭寂莫流淙淙淡池倒映金芙蓉
落日層巒客衣冷越行踏徧空林鐘

有感

葉方恒 學亭崑山

思家不即歸鞚鷹條不飛歸家不即到老馬嘶長道男
兒生事出門多古來將相皆征夫馳驅骯髒志不遂百
年過半何為乎手執如意擊唾壺珊瑚為鞭我馬瘖入
門兒女聲相呼繞膝來看髮白無

上黨行 為牛潛菴使君賦

馬昶世 東臨華亭

晉陽雄風稱上黨五龍靈氣恣萬狀陰壑白噴玉女盤
層巒翠插蓮花掌漳潞滔滔西復東連檣扁舸橫波中
夜霧沙沉鼇背黑朝霞日射魚鱗紅路險羊腸九曲轉
熊虎成羣當晝見龍門匝地激千雷鳥道通天窺一線
關河百二比咸秦藩王宮闕鬱嶙峋桐圭作鎮高皇種
茅社分封武帝臣中貴腰橫金翡翠昭容案賜銀麒麟

炊蠟塗椒何足數撞鐘伐鼓孰與倫此時侯門競豪奢
 此時戚里盛繁華香車寶馬遊平樂銀蒜瓊鈎宿狹邪
 狹邪媚婦顏如玉含態含嬌情意足暮舞朝歌白紵詞
 哀絃急管清商曲桂房羅幌焚都梁碎寒為珮月為璫
 千金買笑黃衫客百斛追歡粉面郎鴉青蟬髻飄香屑
 細骨纖肌如冰雪螺黛巧描柳葉眉胭脂妙染桃花靨
 誰家臺館築平陽杏柱蘭楯玳瑁梁堤上綠楊飛蛺蝶
 湖邊碧藕戲鴛鴦鴛鴦蛺蝶相對舞櫻桃顆顆真珠吐
 九微燈豔映攏榆四照花開題鸚鵡才子情深戀酒卮
 王孫高譙擁蛾眉江花山月無窮極春賞秋遊豈盡時
 那知灰滅塵飛早百年光景同衰草二陵寂寞風雨淡

輕薄行

蔣漢紀

波澄會稽

三晉悲涼煙水杳青髮倏成塞上翁紅顏不覺鏡中老
 沙棠樹灰金谷荒縲車蛛網滿池塘風流人散笙歌歇
 殿閣旋為麋鹿場寄語行人休歎息興亡環轉今猶昔
 君不見魏帝漳河銅雀臺汀蒲岸柳年年碧
 洛陽少年騎青驄翩翩來至西湖中手垂珊瑚鞭數尺
 口唱竹枝上高峰大船小船載美人笙簫雜處桃花淡
 眼前歷亂隔秋水身如楊柳心如雲

當壚曲

姚夢熊

襄周太倉

阿姬美顏色照耀臨邛市臨邛之客為停鞭阿姬一見
 心欲歔羨殺阿姬意氣淡未聞琴調先知心便將千金

之身重許客區區美名難顧惜阿姬風流千載無阿姬
恩愛在當壚一生惟識臨邛客白頭之吟胡爲乎吁嗟
良緣易斷絕幾見人生歡會無離別離別一何苦歡會
一何欣汝懷我意徒殷勤鍾情那得如司馬憐才那得
如文君文君司馬何綢繆一朝相訣恨悠悠誓海盟山
尚如此天涯萍水可知矣

送春

濮 棕 澹軒
桐鄉

風風雨雨飛紅雪眼看枝頭純是葉今年不似去年人
明日應無今日春梁間燕子喃喃語腸斷機頭織錦女
錦梭拋擲自年餘 淚雨

歌讀

尤 侗 悔菴
長洲

長歌學楚吟短歌效吳歛一聲河滿雙淚落三疊秋風
四愁孤人生少壯不得意室無懸衣釜無儲西家捧心
逢嫫母東方索米遇侏儒昔嘗學書今學劍我欲鼓瑟
人吹竽譬諸方枘內圓鑿何異北行指南車意氣坐爲
時命厄春蘭化作秋蓬枯今之相者視肥瘠知有貴賤
無賢愚好官皆絲人笑罵貧士獨爲鬼擲揄腰間不繫
三尺組肘後安用萬言書王融歎息鄧禹笑杜牧慟哭
項羽呼吾將出門無去路不如歸臥南山廬君不見青
蓮居士水晶宮裏住隴西公子白玉樓中居天生奇才
人不識相與投棄山川隅孰知上帝咨嗟老龍怒招之
歸來升天衢頂摩青穹弄白日俯視一世如孤雛咄哉

吾所與游皆子類白乎賀乎天下何嘗無

送葉井叔還黃州

田雯 濟寧德州

井叔先生何所見窮年兀坐守一硯文章飛動探窈奧
詩律迺緊多礪鍛大手可扛龍斛鼎談舌久掉驪珠弗
赤脚裹頭隨老僕短褐破絺掩面耐自朝啖粥已及夕
從西讀書輒至旦出門借驢還客拜送錢買酒防人面
小屋欠伸屋打頭風撼紙窗雨淋幔只似繭身土室藏
猥云牒銜朝官選張臂縮爪酸不辭蟬腹龜腸餓已慣
砉然天地入胷臆踰風雷生怪變下筆玉女窺之笑
亂落青冥花萬片恥學干謁操塵祛詞場從教弋者篡
臭腐神奇何足道鳴蛙聚蚊豈所羨妥帖僵硬存大雅

巋然獨上靈光殿南行楚澤濤千頃西笑燕郊山一段
蒲帆竹纜唱黃頭瓦鉢氈巾尋綠礪抵舍兒女來挽鬢
圍爐橡栗時登案傷壁苦吟草根蟲摩空斜過樹邊鴈
冷光短景照枯桑梳骨峭風束腰襟我今送君亦自送
謝病歸老恰秋半北村飼牛耕空堡西溪射鴨煮藜莧
且拍銅斗撥琵琶搔首長天歌聲曼

雪灘釣叟圖

蔣注 曙來長洲

鳥飛不下人踪絕萬木蕭條凍欲折有客高歌踏踏來
披簑獨坐江天雪縮項巨口不上釣六鼈已得蛟龍愁
虎頭罷釣更長嘯七十二峰天地秋涓水鷹揚竿欲投
嚴灘傲睨輕王侯人不識釣叟意子陵尚父將安求

武陵寒食風雨大作

翁富業

以俸錢博

寒食春過半花開逐雨紅吹來吹去怨東風楊柳絲絲
縮玉驄繡戶珠簾江水上美人惜花更惆悵歎息花開
鎖碧雲可憐風雨空飄蕩水迴青嶂武陵溪一葉江舟
煙雨迷雨滴蛟宮龍女泣煙寒古樹鷓鴣啼昨去星沙
春已淡今逢佳節愈驚心墓田處處飛蝴蝶旅客經年
滯楚吟

友人惠硯錫名曰夏山歌以紀之

胡香顯

遇莊武進

學書不成欲學劍餘習猶愛端溪硯我友贈水不贈石
怪得溪聲耳中見秀色欲奪十五女百遍摩挲相爾汝
爲之錫名曰夏山借取郭熙畫中語世人貴賈不貴真

綴墨繡澁空相親頑碑竟作魏帝瓦何似出水巖山新
方壺書比孫莘老過眼不辨誰所草譬如壁掛無絃琴
聊復得之展懷抱西坑後磨誰所識綠絲確眼欲一擲
水墨相團自不分空嵐恐潑衣裳濕硯兮風塵瀕洞何
所待不然牕前取染十斛黛書卷香爐粗遣排萬一端
溪乏津逮我歌夏山兮歌一快

傲白雲歌贈友

陳士望

友韓夔陵

東山臥白雲山前忽遇君君行已到雲深處雲却辭君
渡江去我招白雲雲不來請君樓上一樽開

懷諸駿男在武昌因憶李條侯

蔣

鏞

馭鹿武進

天下悠悠何足齒浙水惟君淮水李李年差長君少余

意氣相逢只如此同事燕臺問舊遊微名落落傾王侯
十千不惜醉都市聯臂羣呼上酒樓是時游俠江南北
半是悲歌能鼓瑟座中更有閩孝廉睥睨賢豪皆辟易
重來促坐亂飛觴紅燭遙遙更漏長君能不飲不歸去
談笑縱橫興愈張亾何君入蠶叢道錦官城外吟香草
余亦追陪羽蓋東醫巫望接桃花島李生獨賦帝京篇
歸臥睢陵又幾年君向中州我山左忽漫相逢又別筵
黃鵠磯邊列精騎幕府雄風當右臂指揮如意靖烽煙
盡說翩翩美書記余媿依人不自由咄哉豎子安足謀
悵望菰城一春雨拂衣高嘯聖湖秋楚天西去直如矢
鬱鬱懷人有吾子李生不見將奈何欲往從之隔秋水

清詩初集卷之六

武進蔣 鑰玉淵

錢塘翁介翁武原 選

太倉王 揆芝壘 高郵李 澄蒿菴

新貴江 閩辰六 錢塘洪 昇昉思 定

五言律

清明出遊

梁清標 蒼巖 真定

春色當寒食河橋列騎遊帝城初禁火杏苑正鳴鳩莫
雨郊壇樹青帘花市樓東風吹柳絮飄落滿皇州

山雪早行

孤城驅小隊出郭映晨曦雲氣山初曉煙光店早炊霜

清言衣集
林收籟寂雪騎度冰遲何處關愁思蕭蕭塞草衰

入山

地不通車馬行行徑轉幽野鳥嗥廟口殘杏出山樓逼
仄漁樵入高寒鳥雀愁人家僊掌上疑是御風遊

上虞山絕頂清風亭

許承欽 漱石漢陽

振衣臨倒影飛步望滄溟蜃市立雲合鯤人古霧腥怒
濤驅地軸陰火亂天星惟有蜉蝣鳥蒸煙不斷青

白溝河

遼宋曾戎馬風煙十六州河聲寒組練朔氣老氊裘斷
餉憂英主催軍失故侯良平持廟算誰定割鴻溝

園居

朱鶴齡 吳江

拭簟茆簷雨開簾柿葉風那堪新髻白還照舊花紅野
艇孤雲外村春敗籜中弄雛成一笑抱膝倚墻東

初秋至桃源

周廷鑑 元立晉江

虛疑武陵棹併作剡溪遊夾壁能行照驚湍易釀秋樹
間惟翠響山外即雲浮更愛橫橋暮蒼涼水石幽

醉吟

不知春事變一飲達玄冥靜數松髯碧慵隨柳眼青鶯
林寒語澀鼉市晚風腥無計驅愁去安能歎獨醒

玉泉山晚步

王崇簡 敬哉宛平

春色多蒼綠幽居感見聞煙空天在水風定樹棲雲平
野懸山影荒汀落鴈群隔橋林路暝泉石晚氤氳

送王覺斯先生祭告西嶽岷江

盛世敦嘉祀懷柔及百神
名山藏秘簡古帝重精禋
玉女峯頭雪桃花溪上春
興來揮翰處川嶽勒銘新

舟行

錢謙益 蒙叟 常熟

斷岸蘆抽白斜陽蓼褪紅
舟行秋色裏人在水聲中
掠燕經殘雨吟蟬趣晚風
陰蟲休切切已是白頭翁

春風

午枕眠方足晴窓曝未終
忽吹新白髮知是舊春風
物候驚柔綠心情怕軟紅
可憐春未老送我向江東

登岱

申涵光 鳧盟 永年

釐祝來何代聲靈走百王
封先群時禮歡助萬年觴
夜

日翻滄海秋雲擁棟梁
問人尋玉簡秦漢總茫茫

郝元直來

磬折戎衣窄黃昏掩淚看
風流吾黨盡潦倒故人寬
醉眼窺窗曙碁聲入夜闌
草堂畱信宿烽火聚應難

遣興

近關場西地林端結草亭
早涼吹散帙夕鳥下疎櫺
山翠遠猶見漁歌夜可聽
寂寥雲水外矯首問鴻冥

滄江

王鐸 覺斯 孟津

向曉開帆去人家盡掩扉
窗陰懸網罟水色受薔薇
童熱迎船浴鳶饑背雨飛
舟行睡漸足不覺憺忘歸

思白下

回望三山渚江隅路不通
高峰傳意外圓月在愁中
岸溼穿花雨煙香禱廟風
寥寥南與北生趣向誰同

殷伯巖招同白涵三諸公集飲

張益覆輿永平

屢宿陶潛宅今來得數公
竹搖燈影外人醉雨聲中
老惜歡娛異交緣出處同
病軀先就榻應恕鹿皮翁

秋水園卽事

呂潛半隱遂寧

近午過重溪亭空春草齊
幾家團市小一寺背山低
花隱漁人路香畱燕子泥
前賢遺宅在五夜尚聞鷄

夜登君山

日與山相對追涼上晚磯
月沉江樹暗風急浦燈微
舊壘逢僧指荒祠到客稀
登臨期更盡徐趁野螢歸

訪俞無殊鄧尉山中畱贈

張有譽靜涵江陰

一徑逶迤入登堂眼豁開
空階羅洞壑平地儼樓臺
山翠當簷落花香拂案來
山陰同訪戴興盡尚徘徊

螺川早發

王猷定于南昌

月落秋山曉城頭鼓角停
長江流剩夢短權撥殘星
露溼鷗衣白天光鴈字青
蒼茫回首望海嶽一孤亭

送憚道生之潁州

何者爲長策看人老一生
艤舟橫可渡江水靜無聲
古道黃塵暗炎天白髮行
秋風雖有約惜別不勝情

過徐文在西余山莊

吳偉業梅村太倉

已棄藍田第還來灞水濱
煙開孤樹迥霜淨一峯真
路

曲山迎杖廊空月就人始知蕭相計畱此待沉淪

送周子俶張青瑁之中州

誰失中原計經過廢壘高秋風向廣武夜雨宿成皋此地關河險曾傳將士勞當時軍祭酒何不用吾曹

課女

漸長憐渠易將衰覺子難晚來燈下立攜就月中看弱喜從師慧貧疑失母寒亦知談往事生日在長安

送許竹隱之任思州

汪琬鈍菴長洲

一官何足問迢遞瘴江濱人習姬隅俗禽啼格磔春金蠶爭事蠱銅鼓共祈神為報諸君長于今漢法新

咏雀

賦質何微細卑栖自不辭引雛銜短穗趁侶上枯枝叢薄寒煙靜茅簷夕照遲此生堪止息何用徙天池

秋日水亭集飲

馮溥易齋益都

滿目滄洲趣誰知在鳳城芳傳荷芰密秋入管絃清杖屨今年勝風塵此地輕願言攜襪被倚月聽吹笙

登金山寺

獨有金山寺江心翠欲流羣鴉爭楚樹一鴈叫邗溝法席馴龍性離筵動客愁蒼茫鄰北固鐵笛正橫秋

到九江鶴聞湖散步

同喻宜仲曹能始陸赤侯

林古度茂之福清

相逢皆舊好閒步亦淡情嶽色高含霧江光冷過城無期往返易每日嘯歌清漠漠衝寒鴈愁聞時一聲

秦淮秋泛

水汎清人意秋光最可憐已逢邀客酒詎惜買舟錢雲
薄山仍月風長樹不煙去來何處所只在蓼花邊

舟中懷人

林 奎 子野侯官

雨餘山自好適在放舟先古木淡虛壑孤村靜遠煙懷
人落日後搔首數峯前秋葉紛思亂推篷未可眠

園居卽事

魏裔介 貞菴栢鄉

爲園依雉堞蒼鬱亦羣山霞帶秋光淨雲收野鶴還移
花遮曲徑激水下松關酒史茶經外餘生聊復聞

過定興拜楊椒山墓

何世無龍比哀君王佐姿孤墳畱易水碧血黯荒祠正

氣無今古招魂有歲時白溝遺戰壘樵徑野風吹

出門

孫枝蔚 溉堂三原

貧日出門易高堂淚正垂千秋賢繼母一體視孤兒凍
樹鷄鳴早征衣燭滅遲柴扉看漸遠定省復何時

宿天池山下野人家

月出前山口山家未掩扉老人畱客住小婦採茶歸路
滑流泉過墻頽野竹圍夜來清夢好此地犬聲稀

元夜索火不得

貧日無佳節元宵倍早眠索燈喚稚子聽雨愛寒天何
處燒銀燭誰家列綺筵揚州十萬戶野老太蕭然

登華山

楊思聖 猶龍鉅鹿

清言夜集
白帝蟠西陸川原彌望中真形胎造化怪石老鴻濛鐵
鎖千尋引天門一徑通超然人境外俯視盡虛空

四月大雨坐臥小樓竟日

葉方藹

詔菴
崑山

池漲疑無岸樓居恰似船一枝吾自適百尺客誰賢盈
涸隨溝澮行藏信簡編豈真笥腹滿羸得枕書眠

湖上

巖

沉

顯亭
餘杭

臨安行在地尚有望湖亭堤柳和煙嫩山峯夾岸青故
宮雙燕子過水一蜻蜓可惜葛坡嶺長愁戰血腥

喜備五至

別來殊不久百感積難禁剩有三春病兼無數月音愁
思橫遠樹歸夢歷荒岑下馬看顏色知君共此心

雪後登歌風臺

顧大申

見山
華亭

一劍收秦鹿秋風萬里心悲歌誰掩泣壯士已成禽井
邑新豐舊龍蛇大澤淡殘碑埋野戍雪後此登臨

重過南池

紆徑行人少春風爛熳花遙天橫獨鶴急鼓亂浮槎院
靜游絲落亭空翠竹加比來巖壑穩漫解憶京華

韓公巖遺腹生子

龔雲起

成山
武進

爾若如今在今朝醉可期命名占座客齒序列宗支豈
謂虛靈席終難對酒卮洗兒鄰共會湯餅薦空帷

客豫章喜雨

不圖此日雨親愛乃如斯亂點誠珠綴飛絲實錦垂衝

塗泥不怯穿屋漏何辭三月枯無韻朝來自咏詩

古劍為張幼量題

宋徵輿直方華亭

可憐千歲後還得萬金名色照蒼苔古光隨碧月生奉
環嬌玉女開匣走山精寄語張公子延津莫漫行

下灘

孤舟下石灘雙槳出雲端浪影分花落濤聲濺雪寒亂
山皆曲向飛渡怯迴看千里無諸國天南自鬱盤

太原雨夜

紀映鍾蘇子江寧

并州連夜雨秋水漲汾河萬嶺交陰氣孤城俯白波鄉
心驚巖築驛使阻盤陀霜令邊庭早清商人浩歌

客舍屢空久矣牀頭忽有斗酒喜而咏之

不愛從羣飲偏宜獨酌閒孤燈聞鴈去明月下庭閒已
過重陽日空懷負郭田憐他老瓦鉢窈窕勝雙鬢

絕頂

絕頂藏僧舍來尋路不明雙峯看月出一杖撥雲行寺
古花為曆山淡鳥報更任教煙火斷量腹食黃精

過石仲生齋看竹

傅維鱗掌靈壽

懶我曾多事栽松始出關憐君青眼共喜借綠筠看雨
色凝新翠山光割暮寒隔籬纔數武日得醉來觀

卽事有感

戴本孝務旃和州

比歲空山裏難將石代糧逋丁多獸散勾騎攫人忙屋
坐寒狐月田飛野雉霜石壕村吏句今古事堪傷

韋祠觀海棠

李 壽 坦園 高陽

招提南郭外遙識錦浮圖接座光凌日開襟香到膚金
戈絲歷劫龍象護雙株喚醒華清睡重來舊酒徒

瓶花

幸爾伴幽獨兼無風雨欺容華如可久采折豈非宜
靜香虛牖心傷別故枝物情違所性珍惜詎能知

縱麈

走險來何意相依日月深雖緣避刀俎寧不憶山林付
託空王地馴調梵唄音近郊多獵騎春草莫重尋

張秋旅店

楊雍建 以齋 海寧

竟日驅馳瘁荒城又幾家亂雲茅屋覆疎月小窗斜不

寐聞砧杵相思隔水涯來朝還策蹇莫問客程賒

過洞庭

彭而述 禹峯 鄧州

誰說洞庭濶今纔受一舟江豬迷舊窟地肺結新丘脉
絡通吳會風聲壯岳州適來不渡此如未向南遊

沅州

兩度沅州路俱逢孟夏時雕梁還乳燕茂樹更呼鸚越
嶽新開郡牂牁未罷師五谿傳俎豆獨有馬公祠

永寧州

纔過鷄公背還從象鼻行雲根一寺出石髓亂溪鳴歲
月金錢費關河鐵馬情似聞南詔使廟算欲休兵

清溪

孫 治 宇台 錢塘

徒倚清溪側徘徊高柳間鳥飛仍帖水雲吐復歸山野
客荷鋤立漁人擊楫還狂歌出塵表與盡掩柴關

盧溝橋

李雯舒章華亭

絕塞桑乾水來從畿甸流跨虹通紫極到海近滄州萬
馬春泉給羣山晚翠收聖王終有道此地不防秋

半塘月夜

程邑翼蒼新安

夜夜半塘月清光猶昔時水平人影度樹密鳥巢移閒
覺秋心遠寒生詩思遲已無麋鹿感千古一鴟夷

出塞

陳之遴素菴海寧

陰風吹不歇轉鬪過龍堆千古殺人地一身提劍來血
腥膠甲縫霜氣透弓胎敵陣前驅近蒼黃夜探迴

夜駐海州北郭

杜立德純一寶坻

停驂宿馬耳環睇夜蒼蒼月傍山城小雲連海嶼長譙
更聽遠權荷浦薦微涼坐久垂堦露星河靜可將

青州道中

千里行來驟雲煙一望迷河山雄海岱封土重青齊古
塚丘陵立殘碑風雨題興懷尋舊跡莽樹踏蒼隄

久不得家信

張恂穉恭涇陽

亦是人間世如何信息難塞垣將歲匝寒燠自相看白
髮憎多慮青春惱廢餐百齡王母在誰竟報平安

月下從樊河趨鐵嶺時雨後新霽

塞月秋逾白溪毛雨過香寒蛩吟斷續老馬智微茫霧

隱新開境煙迷古戰場遙聞荒犬吠客意更悲涼

望華嶽

梁銓仲琳三原

幾折層巒上猶然蠹數峰橫雲迷綠逕危日挂青松泉石生洪浪仙居切九重亭亭天外峙一片玉芙蓉

新柳

王士祿西樵新城

春水滿清溪春風吹大堤千條煙欲綠三月色初齊弱葉移鳥影疎陰散馬蹄不堪金管發腸斷渭城西

宿觀音巖曉登西峰絕頂

千巖幽憩處境寂意能閒殘月夜侵牖晴雲朝滿山風捎箬笠側日照石梁斑長嘯振衣去居然霄漢間

除夕和少陵杜位宅守歲

堅坐殘更燭無聊祇作花逡巡消甕蟻卽次起林鴉逝景驚心屢初風入髻斜不須求爛醉終覺是天涯

靜海驛

嚴我斯存菴歸安

揚帆大河曲驛路轉蒼茫霽月平沙白孤雲海氣黃人家依斷岸鴈影落寒塘何處傳鄉信春風徧野棠

琉璃廠燈市

龔鼎孳芝麓合肥

天寶傳遺事華燈帝闕東卽今移錦榭依舊領春風簫鼓千官暇樓臺百戲中小侯金彈子斜日落雕弓

重陽登雨花臺

萬山青酒幔一半入殘陽帆外愁長路花前得故鄉煙波天浩浩陵闕晚蒼蒼漸覺林楓變高城已薄霜

春星亭

南荒遷謫客興適亦雲泉兵氣迴銅柱山霞絢木棉蠻
姬宵奏鼓官水曉論錢只有清貧好生涯飽涉川

嘉禾寄懷策端明先生山居

萬斯備允誠鄞縣

戎馬徧南國荆扉獨隱淪琴書娛白髮板蕩失青春世
事衰闕老生涯阮籍貧向來高蹈志寂絕更誰鄰

沔縣村居

費密此度成都

故國不可到春風吹閉門烏巢原上樹花落雨中村事
簡人過少居淡褐自尊無書傳弟子耕鑿在乾坤

雜咏

張遺瑤星江寧

淺水平溪路閒閒自一村夢回天地老亂後友朋存芳

草生幽澗新鶯作小言好山纔放眼久不望中原

巫山

熊文舉雪堂新建

一片巫山雨人間識異香才華憐宋玉婉孌逐襄王古
廟餘蕭颯孤舟泛混茫不知遊子夢偏只在江鄉

白帝城

白帝城猶峙永安宮可尋英雄情掩抑今古事浮沉落
日玄猿絕孤筇芳草淡無繇弔詩史寂寞少陵心

出青門一日渡涇渭

曾畹楚用寧夏

到眼春風過關河渡未休九州從時起八水自天流寒
食客中盡高城雨際浮雄圖此百二日暮漫淹留

折灘

輕生且醉眠失計下山巔船白峰頭落人從浪裏穿春
波傾白雪石竇迸青天回首龍巖上千川與萬川

汨羅江望三閭大夫廟

程可則石驪南海

自識離騷賦長憐澤畔吟山川過雨雪祠廟失登臨江
濶黃沙暗天寒白日沉如何非賈誼流涕亦沾襟

見雪

十載南天外淡冬見汝難一從鄉國別兩度客中看野
寺絕塵鞅空齋增暮寒星星煨芋火敢自擬袁安

昌化寺

辛民霜期宛平

白雲淡處寺亂石倚柴門市小鹽爭價霜高菜煮根山
魘寒作嘯谿水激成喧夜半鐘聲罷殘燈是佛恩

和汪蛟門閣中留題韻

曹禾峨眉江陰

返照禁中晚開軒人吏稀游絲當袖捲野鴿傍樓飛椒
壁詩猶溼琴臺客久歸娟娟新月下餘韻共清暉

夜東王少參舟中

姚締虞岱麓黃陂

薇省辭黃鶴蘭橈伴白鷗岸迴江月抱霜迴雪雲流銀
漢乘宵上金陵逼歲畱田租聞賜減側識漢皇憂

贈別

王一翥補菴黃岡

冬影蟾明夜籬光雨後天樊湖空翠樹秋浦綠雲泉投
宿疎簾燭深盟古寺煙嵇康無著述何事里人憐

感遇

李振宗欲仙嘉興

芳草依江渚繁花遶砌中平分春後綠遙傷日邊紅遇

豈中行氏書傳圯上翁生麻欣有植不復歎飄蓬

與子星石溪夜話

程正揆 端伯 孝感

一榻懸高座相同竟夜分周旋寧作我笑傲獨宜君睨

粟淘清茗坵絲捲白雲非非天外想未許俗人聞

留別毛子霞

查容 翰荒 海寧

久矣思鱸膾飄然挽鹿車雲開吳嶠出日落楚臺虛湖

海論交晚于戈解纜初剡溪春雪夜乘輿到吾廬

春眺

岳東瞻 起霞 漢川

信步尋春去環郊綠一圍花香涵雨潤柳絮逐風飛舞

蜨畱疎影歌鶯弄落暉徘徊溪路轉攜手送雲歸

太原春讌

惲 驕 心山 武進

一劍長遊客相逢盡故人論心忘夜永得句爛天真玉

笛梅花瘦金尊竹葉新年華隨處好何必沁園春

寄和聽雪樓

郭金臺 幼隗 湘潭

龍向樓頭臥歌從天外聽風迴山浙瀝雨洗日空冥素

女嬌何似高唐夢未形天涯知己在共醉莫教醒

夜泊危家渡

張三異 禹木 漢陽

白露凝帆冷鐘聲出寺南月華穿曲徑山翠落淡潭舟

泊雲同臥燈殘酒半酣縱多愁緒在不敢負幽探

送鄭次公北上

徐 棕 子宗 江寧

亦復苦行役旗亭應放歌但驚年髮改偏覺旅鴻多世

事元無極詩情近若何別離始今夕聞問肯蹉跎

讌席偶成

金蘭旌

子萬錢塘

四座狂歌客金臺握手初酒聲燕士筑藜影漢臣書爐
炭紅燃獸盤冰白膾魚禁街風雪夜誰許醉騎驢

待松石茶不至

吳

璿但小丹徒

蘇鼎安松側瓷甌覆几邊近添新活火遠發舊山泉採
焙菴僧慣封題信使專雨前常計日烹啜媿年年

西溪觀梅

錢

璜右玉錢塘

一權西溪去閒探十里梅花繁凝雪積香遠逐風迴蕢
酒尋山寺題詩倚石臺莫聽羌笛奏片片已吹來

羣史山堂小飲

彭善長

爾千閩縣

懶慢稀逢侶羣公愜素懷衝泥來曲巷把酒坐空齋細

雨侵珠絡飛花泣玉釵春寒入條柳盡日且停驕

哭老僕薛宏

彭始騫

仲亮鄧州

廿載兵戈裏長懷鐵石心彎弧太行險破賊蕩湖陰筋
力風塵盡膏肓歲月淡傷心南詔路地下故相尋

新昌道中

翁遠業

屈子錢塘

石疋危欲動近郭下籃輿邑小羣喧市年饑益種畚積
雲喚鳩婦澆樹狎啼狙觸熱傷行役東臯思著書

寄懷

卓

域永瞻武康

風雅師公輩偕來此探幽同時推博物獨許賦悲秋佳
客三珠樹高人百尺樓廣川羈旅思何日一帆收

彭澤

劉振鐸

天木武進

山縣秋冬雨江城晝易風昔賢官舍在吏隱酒杯中傷
岸常欹柳無絃亦種桐不知千載意今日與誰同

秋日訪嚮中

丁 滌素涵
仁和

為訪橋西隱頻來過草堂孟公惟翹葉小謝愛池塘我
到疑盤谷人傳是辟疆高樓多逸興煙樹晚蒼蒼

觀荷

楊 楷端木
武進

昔來湖畔石菡萏為題名滿地收紅雨隨風點綠萍青
錢若箇小阜葢已成擎不醉今何待秋高聽雨聲

幽棲蘭若

余光炅初美
大冶

接葉濃如雨層巒自一天鶴招高士舫龍守老僧禪桂
樹孤畱影齋厨暮裊煙無人賞幽趣嶺外月空圓

自江陵奉家慈舟之武陵

周 損遠害
麻城

觴豆祭風色吾浮家武陵天知頭白母宅與面黃僧漿
打過江鼓篷撐入港燈沅流省子力編美上秋罾

夜吟二首

郭 棻快庵
清苑

客况凄于夜秋風不肯停樹煙千葉老窓影一燈清哀
角驚羣鴈輕雲澹數星禪關猶未寂蛩語細堪聽
萬類此時息惟餘星斗橫天高遲沉瀆市遠靜簫笙不
畏文昌暗翻嫌太白明眼中無快事匣劍詠難平

送孫豹人徵君南還

陸嘉淑水修
海寧

山人掉頭去不脫山人衣總向風塵老誰令心跡違傾
裝買吳艇計日到荆扉得似南歸鳥因風曉夜飛

江行二首

錢捷陶雲象山

白葦從西靡舟行欲向南橫風吹木葉小港近村帘楊柳陰遮日葫蘆蔓掛簷江聲今夜靜不待榜人占日夕度歸鳥風輕緩上游前村多柳樹野泊少魚舟射辟行客虛籌挂戍樓來朝看風色又過幾山頭

種菊

周維秬錫白麻城

孤情謝眾艷獨與此花謀移雨初分植含霜預報秋修成三徑僻添得一庭幽未到花開候先思卜夜遊

江閣

吳軫星子容縣

江閣人重上空臺鳥自飛峻風吹日動孤柳人江微近寺櫻桃熟何山首蒼微十年思射獵猶着幕南衣

滕王閣晚眺

胡亦堂二齋慈谿

高閣古城邊臨流勝概傳滕王不可見章水自悠然畫棟寒雲舞樓船夕照懸滄洲何處是莫漫覓神仙

更酌

王舟泳思合肥

倚枕難成寐清尊且更開月攜花影上風挾竹聲來人靜偏宜夜天空好放杯寒蟹興不淺共我話蒼苔

檐園

徐崧案之吳江

檐園天下望勝侶向風來自是論文地誰非蓋世才古今書萬卷賓主酒千杯將見傳經術非徒著玉臺

沙河

胡海天目彭澤

已覺東方曉環城足趵起一灘沙汗漫十里馬躊躕仙

跡開青睞人功導白淤北風霾漠起綠柳渡平渠

遊赤壁

張聖錫 岫庵廣寧

昔人曾載酒今我獨遨遊芳草亭前長空江檻外流棲
遲松樹下眺望寶山頭興至還呼酒歸來一泛舟

黃鶴樓晚遊口占

龔鎮遠 君藩遠陽

仙人何處去遺跡此山頭水湧千層月天開百尺樓蕭
蕭紅葉落寂寂碧波流返照空靈色凭欄晚更幽

小園閒步

田甘霖 特雲容美

三徑雖荒僻猶堪宿野雲求羊無舊侶麋鹿入新羣
葉清花氣穿林畫鳥文聊將歌一闕爛醉破紛紜

江漢雜感三首

馬道耕 武進

夾道榆錢落漫溪柳絮飛送春詩債迫久客故人稀江
水新添漲家山正熟薇天涯重離別忽忽悵忘歸
春事已云邁飛花點袷衣楚山青欲滴漢水急如歸才
豈諸侯重狂宓屠狗依自今焚不律高臥掩荆扉
抱郭有茆舍柴門臨水開漁罾支臥柳釀甕熟新醅
信憐兄弟交情富酒杯不堪累安邑歸去理蒿萊

入灘

金憲孫 即度清苑

湘江行已盡瀟水接長流灘過三門險風生萬壑秋圓
沙衝小燕急瀨泛輕鷗衡嶽當芻起還陪蠟屐遊

戲答津吏問

津吏勞相問微名不可招終軍羞棄帛司馬懶題橋
禪

楊容高座仙班充散寮近來原好事一葉五湖飄

登疊綵山風洞即目

盤陀攀桂嶺疊綵入長空日麗丹霞境雲開花梵宮江
心翻逆浪洞口舞迴風咫尺天涯路扁舟瘴海通

補種平山堂楊柳

孔尚任 東塘曲阜

太守行吟路春風幾度荒從新刪亂竹照舊補垂楊園
老遺佳本山僧得種方明年寒食節煙雨滿空堂

西團

東港天邊水西團海上村百夫當有長小吏亦能尊兩
脚平垂野潮頭直到門鄉關無定向悵望立黃昏

夢遊水畔曉出西郊眺望

李沂 艾山沂興化

曉霧依空捲春流出郭分斷橋斜壓水亂樹遠屯雲絮
密粘漁網舟輕入鷺羣隔溪鐘磬發疑是夢中聞

香櫟

老樹何年種孤根倚短牆春枝一院綠霜實百團黃望
本垂簷重携來滿袖香江城秋欲暮情思正茫茫

過武陵諸山

黃與堅 庭表太倉

蚤蹴層坡上崎嶇易失羣空江含故雨絕壁晚寒雲鳥
向天邊落村從馬足分漸經幽箐裏百草暗流薰

催阿震移竹

陶澂 季淡寶應

牆東三畝宅儘可萬竿生但得經營暇須教種植成繞
園休過密疊石更餘清待我歸來日狂歌徑裏行

立秋日

東雨颯然至井梧驚素秋蒼涼小山外鏗鞳大江流薄
醉全支枕孤懷獨放舟似看新樣月偏照別家樓

宿余吾室中

李鴻逵厚餘新城

民居半石壁陶穴古遺風草寄懸崖綠花明落照紅晚
煙衝地出層屋架天空謾道征塗客野蔬亦足充

約諸弟後園避暑

劉元徵夢闡大名

茅屋蒼林密方塘白石斑閉門三伏過謝客一身閒雨
氣叢篁外蟬聲老樹間惠連時得句兼喜慰衰顏

新正十三日飲成相國第

歌鐘當勝夜燈火正新春丘壑神仙第絲綸社稷臣盈

門喧櫪馬合坐醉車茵求劍時方切恩光下紫宸

三原署中見瓶內梅花

熊一瀟蔚懷南昌

荏苒春經月韶光總未知偶然停轡處纔覺看花時紫
陌塵千頃黃昏酒一卮芳菲應笑我明日又西馳

送樗亭南還

陸嘉淑冰修海寧

曾訪葺城外蕭然汝閉關亂堆書萬卷小築屋三間偶
逐羣公出仍驅匹馬還浮雲自舒卷未擬負青山

採蓴

吳彥芳香為閩縣

最愛湘湖水春山雨漲時香泥沾柳絮玉筍吐蓴絲采
采不畱手盈盈翻溜匙卻嫌王武子羊酪謾多脂

雙松

唐大陶鑄萬夔州

清言不集
堂下雙松樹亭亭自古今餘青入戶牖流響忽山林坐
此聞清籟何須寫素琴憑君滌塵累長共歲寒心

玉山夜歸

王士禎阮亭新城

渺渺空江路人歸獨夜舟迴看玉山暝遙下石簾流佛
墻鈴相語漁篷火未收霜天閒急柝鬢髯辨瓜洲

題杜工部秦州像為曰緝侍御

杜陵人不見遺照自輝光離亂經天寶艱難剩草堂東
屯田父宅西閣楚人鄉才子千秋淚青蓮亦夜郎

蔣修撰虎臣述天台之勝賦贈

太史三茅隱朱顏薄世榮言尋沃州路遙向赤霞城語
識寒山妙詩同太白清石梁橫地底今夜夢經行

從林徵君茂之遊晚過棲賢精舍

胡澂靜夫休寧

得從藜杖出高興自先生一徑破苔色繁花遮眼明主
賢親掘筍僧老愛聽鶯坐久林香細忘言各有情

窺園

賀振能蓬仙獲嘉

不奈居城市幽棲片圃空牕畱高士傳徑遶菊花叢丘
壑容開帙風塵任掩蓬蕭然窮達外敢謂古人同

黃源晚泊

陳鵬年北溟湘潭

竹樹平連岸沙村獨繫船霜深寒月皎風急暮砧懸旅
夢隨秋盡歸心在客前計程爭旦晚此夜更如年

鳥道

鳥道不容尺馬蹄春更難古泉靈草護奇石老根蟠蜃

氣藏沙蟲樵歌出洞蠻尋幽吾自適滴翠滿衣寒

棲霞寺

濟南靈巖荊州玉泉天台國清江寧棲霞

俞

楷陳芳泰州

寰中四古刹其一號棲霞松有齊梁色碑傳唐宋家塢
光搖虎穴殿影照龍沙最喜門風遠都來五葉花

蚤發上黨道中

劉芳猷

巨鄉寧夏

三月寒仍在五更風滿衣鷄催農半起星與鳥同飛樹
色沉青靄鐘聲出翠微山城春力薄鬱鬱望朝暉

蕉

飄泊羣芳裏依依清自如不將香色媚應與蝶蜂疎有
恨因風雨無心任卷舒相看非鹿夢畱伴一牀書

登岱後黃華洞

姚

曼東只新安

說有奇觀在扶筇更一過澗溪吞瀑急松老食雲多小

閣驚風雨孤亭敞薜蘿黃華遺跡處春草尚婆娑

偕友人南歸余先渡淮感賦

朱

奭天錦吳縣

同是牢騷客離羣煙雨中低頭思塞北判袂渡江東綠
柳枝間鳥清淮水面風那堪為客次先後作歸鴻

送李三石歸山中

陳

愷挹蒼江寧

聞道先生隱青山舊有家一村攢竹樹夾水種桃花谷
鳥庭心下溪雲屋角斜幽居惟課子客到話桑麻

牧雪

鞏我造

琴麓真寧

高高上山坂逐草失前蹊古墓攬爰兔陽坡拾斷藜飲
泉聽暗響尋犢數歸蹄莫訝來何蚤寒雲晚更低

木香

張潮歙縣

消夏方無策落花喜滿林
去年纔五尺今歲已兼尋
葉密天難見枝繁日不侵
豪家饒錦幔猶遜此陰森

霧

陳于王健夫宛平

元氣乾坤滿茫茫不可收
山藏知翠隱江失見天浮
無雨沾衣溼非煙入樹稠
風吹涼更蚤散作洞庭秋

夜宿古中盤

鄭緯哲象南安

香剎中盤勝山峯紫蓋名
聽經雙鶴下繞堦幾僧行
翠竹風搖亂黃花露滴清
納涼時岸幘欹枕欲三更

晉楸新野城北

李鴻青立鄧州

屢劫畱奇榦孤生不傍林
摩雲空有骨閱世已無心
皮脫霜痕淨根盤雨氣淡
居然晉處士郭外此招尋

聞蟬

凌象木道通州

榆柳坐長鳴風高聲更清
無情因候動有恨逐人生
閣外秋天近林端宵露明
由來不求飽非是為身輕

過幽棲蘭若

余光炅初芙蓉大冶

接葉濃如雨層巒自一天
鶴招高士舫龍守老僧禪
桂樹孤畱影齋厨暮裊煙
無人賞幽趣嶺外月空懸

喜馭鹿過訪畱飲復堂

顧有年縉中仁和

客過逢秋雨淹畱喜暫閒
開樽同夜話投轄莫言還
逸興傳三雅新歌試小蠻
可情溪畔路流水更潺湲

雪夜

程飛雲拙庵景陵

靖節古奇士驅之寒與飢如君堪共語兼我亦同扉拾
葉備炊晚分光到字稀吾廬真此樂有鉞莫彈鱸

馬

陳秉樞叔霞
莆田

龍駒原有種伯樂久無人市骨徒虛語披圖恐未真空
羣知逸足絕影見丰神萬里驍騰去嘶風靖遠塵

邗關雨泊

馬駿西樵
山陽

孤篷懸夜雨晨屐怯衝泥雪密江城暗濤淡沙岸低津
橋羈市舶畚畝溼耕犁較量陰晴事鳩聲滿竹西

東還畱別鄧陽諸子

毛捷月三
武進

若問東歸意庭幃有老親山川憔悴客天地浪遊人蘓
季裘仍敝馮生鉞更新飛花兼乳燕入望總傷神

大水度泗州

呂潛半隱
遂寧

浩浩春濤濶孤城一葉浮煙塵淮水暮風雨泗陵秋成
壘存官渡原田縱客舟年年涉江渚愁絕此中流

遊冶原別墅

王嗣槐仲昭
錢塘

萬仞澄潭下潛通海眼幽青蛟蟠水府白霧吐山樓夕
飯新菘脆秋眠家釀柔蚤知濠濮趣應共惠莊遊

江泉

楊素蘊退庵
宜君

虬龍蟠古水鱗甲動深湫靈怪噓雲雨蒼茫黯斗牛興
亾歷百代霜雪飽千秋日暮悲風起茫茫白浪浮

過龍門

神禹功何處龍門此更看長年狎怒浪亂石走驚湍江

繞羣峯斲山圍小閣寒片帆風雨滿日暮下前灘

湖上遇林玉蟾即飲寓樓

吳綺豐南

不減狂奴態相逢老益親青樽閒過夜紅袖晚留春欲
歎翻成笑無慙幸有貧兩峯霜葉在爛熳屬閒人

南嶽頂觀日

屈大均翁山

中宵登嶽望閭闔赤霞邊光采頻迎日空濛不見天蒼
梧龍馭失紫蓋鳳樓遷萬古湘纍淚東皇太乙前

靈渠

開陡船爭上靈渠水滿時穿來自秦漢流出注湘灘片
雨添三尺千峯繞一絲相思如此水南北不相知

贈郭臯旭

鷓鴣元越客茉莉是蠻花南荔聊同妾西飛莫憶家蚌
生珠子樹龍織海人紗自可成豪富無令金谷誇

過法海寺

郭士璟眉樞

為取高山意相携到上方欲來迎爽氣恰好近重陽是
樹經霜色千村熟稻香誰言江路遠風景在雷塘

下第後初至山房

周祚弘乾甫

別去無多日秋深今又歸螢乾書卷在苔滿履聲稀遶
戶流淙過連山敗葉飛舌存難問婦還復坐漁磯

望岱

柳寅東鳳瞻

邃古誰開闢東維奠輿區廢興輪日月封禪遞唐虞山
呼今天子壑容古大夫長生如可學應有白雲都

贈江郎黃紫房

陳潤龍季

相見無相問由來識姓名探丸時任俠畫地獨論兵少
婦邯鄲曲仙人緱氏笙馬周方作客疏草動公卿

晚過毘陵

方伸位庵

毘陵真澤國傍水作人家牕裏魚罾出城邊渡艇斜白
鷗吹細浪紅蓼吐繁花日晚迷前路蒼茫天一涯

舟滯

巫之巒巒釋

聞說盱江路乘風可計程孤舟煩短櫂五日儘長征木
榻幾昏曉蓬牕歷雨晴晚霞風漸細高樹又蟬聲

贈劉千里

魏象樞環溪

東壁聯荆楚藜光近石渠十年名士賦七發古人書只

合隆中望難從洛下居鬚眉橫老氣龍性欲何如

周櫟園致大根菜

繆彤念齋

滋味本尤異根苗更鬱葱何由生冀北忽自到江東辛
苦風霜後芬芳蘭蕙同貧厨方淡食珍重貯筠籠

余吾山在劉陽縣

鄒枚馬卿

為隔河渠遠安然作大荒司空方按籍版尹敢分疆田
稅相因事公私必兩妨楚郊多廢壤誤指白雲鄉

上巳步水濱小雨仍往看杏花

梁清標蒼巖

令節渾無賴山雲枕畔生花須乘雨看客為湫流行龍
口春波滑田家曉夢清杏殘如老公惆悵未聞鶯

贈陳子萬令安平

俶儻荆溪客高秋捧檄新家門推俊及兄弟並詞人訟
少湘簾下民和乳雉馴莫言寒漸逼花發博陵春

長至日聽六弟讀書禪室

詹大衢陟園黃岡

一線初添日三餘適旅居無心翻舊案有弟讀新書鐘
磬聲同徹楞伽義自如六時須各勉楚越總蘧蘆

舟行雜詩

曹溶秋嶽秀水

折肱諳世法野議切三緘不宿投簪諾曾嗤報客函丹
楓閒到枕白鳥掠爭帆一片蒹葭外焦山石可劖

其二

汀花呼擊槳無意作征人僮僕能師拙王侯不敬貧文
場埋日月瘦骨謝麒麟尚有千秋宅滄湖釣錦鱗

冬日寓六瑩堂夜飲分賦

陳恭尹元季南海

過雨聞簷溜南天未有冰月開梅下地風定草堂燈淺
酌猶煩主淡宵况得朋預知吟興罷書貴剡溪藤

南海神祠下作

望遠孤亭盡憑高古殿尊碑畱千歲字禮降百王言匯
水成天塹排山作海門登臨何限意稽首候朝暾

飲餞東湖草堂卽事

宋昱懼聞山陰

弱冠推文賦東湖草樹依趣裝當祖道惜別欵君扉銀
鹿携琴至金釵換酒歸羣賢相送處高柳稊風飛

鄧尉山探梅

陸鍾呂卷翁商丘

聞說寒香發輕舟溯碧濤浮雲歸洞壑孤岫出林臯鶴

放僧難認霜飛日正高
長安有好友驛使莫辭勞

西瓜

戴本孝務旂和州

塞上寒瓜種聞從回紇來
清秋消酒渴烈日驗冰胎
白虎金流液紅犀蜜漬開
臙脂山下熟色味不須猜

罍圃坐暑

許之漸青嶼武進

市遠鶯花圃人過鴈齒橋
得閒經綠野娛夢託青霄
一壑聞吳詠三秋續楚招
扶衰欣作達未惜杖頭遙

可園

碧落澄秋影青燈獨夜清
鵬搏依化蝶鳩拙聽遷鶯
雲子炊香飯冰絲絮茗羹
平生飛動意一室自經行

陪家僉憲伯宿白茅寺

吳雯天章蒲州

夜久下涼露空明映石根
更教促坐席還與集南軒
洞溼龍歸峽風腥虎到門
何曾累機事終得暢清言

汴樓喜春

生菜細堪嚼玉壺歡更陳
鳴箏樓上客挾彈柳邊人
寺堦畱殘碣宮鈿感故塵
當年歌舞地幾處鎖寒筠

蓉城雜感

董以寧文友武進

聞說春歸後長安遍落花
吏監蕭相獄客散竇嬰家
且盡中山酒還驅下澤車
相逢行樂好毋復問京華

望海

高閣一徘徊田橫安在哉
魚龍驅日出風雨擁潮來
海氣晴難定山容暗復開
忽聞金鼓振愁絕望鄉臺

鄰家鶴至

江阜渭瞻
桐城

蓬徑無人掃門迎鶴自開偶然過曲檻隨意立蒼苔卻
伴吟聲至初驚午夢回庭堦相識慣常待月中來

借書

書缺從人借開函半未全科頭秋樹下楷眼夜燈前粉
蠹餘殘帙雕蟲守舊編最憐生計薄鄴架亦蕭然

桃花庵坐響雪亭

趙吉士天羽
錢塘

曲徑青苔溼森陰隔寺門懸巖飛雪瀑亂石碎雲根萬
響搖空碧諸天抹一痕虛亭吾獨立魚鳥向寒溫

移居家文敏雪水南遺址秋日登樓漫賦

地偏塵事少竟日絕輪蹄東瀼如西瀼茗溪又雪溪斲

為六月息聊借一枝栖細雨輕煙外秋光萬頃齊

秋夜徐松岑過寓小飲

史岱樂山
金壘

幸託同林友相邀只舊醅官貧無盛饌寓僻有荒臺月
滿宜人醉風高聞鴈來知君不我棄更寫紫雲回

同張石虹訪蔣玉淵寓齋畱飲

賦分
熊正笏元獻
漢陽

取次扣塵關相逢一改顏好春供客醉小艇狎波還風
度曲江在鶯花三徑閒莫愁躑路晚遲日未銜山

雨發萬安

丁焯韜汝
晉江

十八高灘路驚湍觸石多連朝秋雨漲薄暮片帆過晴
樹交青靄風花點綠莎閒鷗如舊識相對狎滄波

登化成巖

李文饒
讀書處

尋幽探往蹟歇馬步山根雲木數峯秀風篁一徑喧春
鳩鳴棧閣夕鴈下江村俯仰懷前哲遺編幾許存

三月晦日作

竇遶奇松濤大名

野水滿橫塘蘿痕印短牆雨來旋鶴井風急亂鶯簧虛
牖納朝霽空亭受晚涼一卮聊自醉未曉尚春光

九日登姑射山酌平泉亭上

毛逵錦來新昌

危亭跨亂水影靜碧潭空溜響泉花白霜飛柿葉紅人
來姑射外酒坐菊香中顏色聞仙好憐余那得同

同友人夜酌

楊州彥宣樓當陽

千古英雄局掀髯一笑中沛公三尺鐵范蠡半帆風席
捲空譚夢燈吹不聚蟲君平緣底事瑣瑣說窮通

春日懷何大左車

王永譽孝揚開原

與子論交久分携忽二年遙從嶺嶠外聞說薊門旋落
拓何依舊風塵更可憐正當春草發夜夜夢君前

泛舟瀟江遊慧力寺

羅坤弘載會稽

南郭唐朝寺藤蘿石徑存仙舟繫沙嶼清吹動江村桑
柘寒煙碧鳧鷗狎水翻徘徊亭上路幽興坐雲根

觀禹碑

絕壁何年勒龍文倒薤披鴻濛天地老剝蝕古今奇荒
度三湘遠神功萬載垂撫摩頻倚徙雲霧滿空吹

舟中看月

吳盛藻觀莊和州

明鏡寫秋光嬋娟夜理粧煙拖青黛小波繞綠雲長玉

清言初集
女盆中淨湘妃竹下涼不知銀漢裏可許浴鴛鴦

送家職方出守桂林

程燧然明歙縣

剪拂情偏至風塵竟似躄大夫從此去遊子復何依杖履山河隔西南鴻鴈稀孤懷如越鳥常傍嶺雲飛

飛鸞橋

李益陽子受大興

竺乾無盡意首善在津梁萬里題司馬長虹頌上皇比堯言下冷驅石過斯狂問取飛鸞旨名山引鳳光

秋日陪羣公赴楊青巖近園之飲

龔百藥琅霞武進

石向天邊起人行鏡裏移開樽邀上客試曲聽歌兒楊柳朱樓畔芙蓉秋水陂狂夫今醉晚何處覓東籬

思恩霜降巡城

金夢麀石子山陰

帝里維垣寄巡行典獨隆干旄懸北斗劍佩貫長虹一字龍蛇競千年虎豹雄成城不在險樽俎奏膚功

李岷瞻以氍履分貺簡謝

趙湛秋水永年

氍製西州履溫寒惠老人着來宜野服步去接清塵小閣爐堪謝空堦雪倍親侯門珠謾詡渾樸見吾真

通舸峽

鄧廷羅偶樵江寧

萬里岷峨道灘高水建瓴自天三峽倒入地五湖冥夏月晴飛雪銀河畫出星倘非古遺愛那得不空舸

宿萬縣望絕塵龕

西嶺懸天表清虛迥絕塵更無雲得到只有日相親楚蜀低三界乾坤小一輪朱幡棠蔭在蓮芰種何因

舟中寫懷

成性率庵和州

野草青千岸扁舟晚近湖多愁止自曉有月令人孤懷
士非吾志出山亦我愚難將舊面目承睫向當途

客江寧將之揚州宿徐藥庵齋中 李恕相如四會

薄雨祛殘暑清齋得早秋買鄰宜白下沽酒是青州
蟋蟀喚微醉芙蓉搖暮愁觀濤還有夢獨上廣陵舟

采石 任光復東頭山陰

畫江憑采石山樹迴成行壁壘新天塹風沙古戰場
明霞牛渚寂碧草鳳臺荒卻憶常忠武揮戈似魯陽

遊敬亭山 丁灝易庵仁和

躡屐登臨處餘訝一徑微泉聲虛石鼓霜氣染垣衣
鳥

道雲歸懶僧房客到稀高風千古在想見謝元暉

秋螢 劉棻香山廬陵

高天涼月外腐草自生光星散疎林影煙浮繞逕荒
輝依露冷點點越風狂明滅沙中火車幃為爾忙

送張南村遊黃嶽 梅清瞿山宣城

黃山渺何處客思在秋邊杖撥白雲路詩成紅葉天
眼中應見海峯際忽乘船倘遇浮丘子壺丹藉爾傳

小集蕪薌舸納涼 朱虹天飲長洲

何處堪逃暑街塵十丈紅披襟池閣畔散髮茂林中
客到添佳話尊開納好風北鄰曾有約惆悵不相同

初入太和山道上 倪長犀六通贛榆

十里清陰密千章灌木加非時鳴澗鳥隨意點秋花鹽
鼓仙都饌瓜當過客茶心疑紅溼處井竈滿丹砂

晚浦

暮色迥蒼蒼寒沙動渺茫光傳漁火細青送菱風香露
下鷗千點春鷺水一方孤帆無限影天外路何長

挾羣妓廣陵較獵

吳崇先鶴山歙縣

秋殘煙在野健翮欲摩霄臂帶飛雕落粧添墜馬嬌奔
騰郊勢動奮擊日光搖羯鼓催鷺晚衣香滿路飄

花朝插蘭

許延節仲將武康

共此芳菲節殊非蕭艾偏如初出空谷不敢樹當門微
雨沾新翠輕雲護淺根直須香九畹始覺荷春恩

荊州雜詩

王梓適菴郟陽

古郡雄南楚金湯屬上游蜀江開虎渡夢澤接龍洲戎
馬當年遍車書此日收獨憐關塞客踪跡尚淹留

二

一水分南北相望咫尺通荒山餘戰壘高浪觸寒風鴻
雁霜天外牛羊夕照中古今興廢事瞬息總成空

三

石馬西風裏行人易感嗟絳臺餘廢瓦宮柳噪寒鴉庾
信江南賦羅舍郭外家幽探愁未減何處覓仙槎

四

能仁當日寺無復見叢蘭僧磬黃昏寂龕燈午夜寒亂

鴻言不集
鴉巢丈室羣雁唳雲端尚有簷鈴在風搖響未殘

五

海內紛馳日荊州客仲宣傷心傍庸主失路惜前賢戀
闕嶠關外懷鄉渭水邊登樓還四望汨沒一凄然

六

爲問章臺地踟躕對夕曛歌殘憐野鳥舞歇愴流雲廢
井沉香盡荒亭蔓艸紛閒來蕭寺外吹角不堪聞

七

沙市通江口繁華想昔年高樓留夜月曲岸聚春船蜀
錦千純至吳鹽萬斛連只今閒眺處斷井起寒煙

